

LEVELESEN

Yesu Kĩlisi hĩlung buc wê obêc val timuên ge vô Jon

¹ Ilage kiyang wê yêp vac kipihac tiga yêp xôpacên, mêdêc Yesu Kĩlisi nêl kiyang tiga yêp seac ên nêb il xovô buc wê ob val timuên ge. Anutu nêl kiyang tiga kitong vô Yesu ên nêb i nêl kitong vô nue yuac, ên buc wê kiyang tyo obêc vô nôn lec ge vô kwabo lec. Om Yesu vông nue angela ti lam hĩlung susu hixôn kiyang wê obêc val timuên ge vô a Jon wê Anutu nu yuac a ge.

² Om a Jon, a xê pyap, om a nêb a obêc nêl Anutu kiyang tige kitong i yêp seac vô xam, di a obêc nêl Yesu Kĩlisi kiyang kitong vô xam hixôn bêga nêbê kiyang tige nôn vixôhĩlôg.

³ Kiyang tiga nêl buc wê obêc val timuên ge kitong. Om xomxo ti obêc kitong kiyang tiga vô xomxo ge od Anutu obêc vông xomxo tige wê kitong kiyang ge xêyaa vô nivĩha. Di xomxo obêc ngô kiyang tiga mi timu vô ge od Anutu obêc vông he xêyaa vô nivĩha êno, ên buc wê kiyang tiga obêc vô nôn lec ge val vô kwabo lec.

*Jon kivuu kiyang vô konglegesen vigê vilu di
sec yuu vac vigwe levac Esia*

⁴ A, Jon, a kivuu kiyang tiga vô konglegesen vigê vilu di sec yuu vac vigwe levac Esia. Anutu wê dô mugên ilage di dô gwêbaga di obêc dô luta lêc luta ge i vông vizid nivĩha i lam vô xam di vông xam nilôm i vô malehe lec. Di Myakĩlôhô

Ngibua vigê vilu di sec yuu wê dô vô Anutu sia king manôn ge, he i vông vizid nivîha i lam vô xam di vông xam nilôm i vô malehe lec. ⁵ Yesu Kîlisi ge wê nêl kiyang vihati kitong yêp seac di o yax ti vun lêm, di i mugên wê kidi lec maviha vac yibên ge di nginoo king wê dô kibun ga vihati vêl di tu he nêl xomxo levac. Om a nêb i vông vizid nivîha i lam vô xam di vông xam nilôm i vô malehe lec.

Yesu xêyaa vin lec il, om ici va hi wê kipyax sea ge kitya il nêd nipaên vêl, ⁶ di vông il tu i nue di ici va viac il, di vông il tu Ma Anutu nue yuac xochê xomxo wê mi si daa ge. Xêseac yuu xêkizêc wê Yesu Kîlisi vông ge i yêp luta lêc luta. Nôn.

⁷ Xam ngô lê. Kîlisi obêc vena vac viyobtoc di xomxo vihati obêc yê i, di he wê tul i ya bîlem di wê byêx i ya yii ge vihati ob yê i êno, di xomxo kibun ga vihati ob xo heche va di byag ên he. Vixôhilôg, kiyang ga obêc vô nôn lec. Nôn.

⁸ Apumtau Anutu wê xêkizêc kehe ge dô mugên ilage di dô gwêbaga di obêc dô luta lêc luta, di i nêl ên nêbê, “Aca va mugên di timuên.”

Jon yê Yesu Kîlisi

⁹ A, Jon, xam lim a, di il xôn tu Yesu xe. A hixôn xam, il xôn kô myavinê di kilê viyin lec Yesu lê mi il le xêkizêc vac viyin tige, di il xôn tu Anutu nue. A nêl Anutu xolac di a nêl wê a vông i vin Yesu ge vô xomxo, om he tii a lam dô lec vigwe kitôn tiga wê yêp vac gwec mahigun ge. Vigwe tiga lê nêbê Patmos. ¹⁰ Om a lam dô, mêdêc Apumtau buc da, di Myakilôhô Ngibua lam hivun a xôn,

mêdec a ngô vya levac ti lam vô a nimig. Vya tige tiyi xocbê vuac tyuc, ¹¹ di nêl bêga vô a ên nêbê, “A ob hilung buc wê ob val timuên ge vô ông mi ông wê di kivuu i tiyi xocbê ông ob wê ge vac kipihac di vông i loc vô xomxo vông vinên vac vigwe vigê vilu di sec yuu ge. Vigwe tigeê lê nêbê Epesas, Smena, Pegamam, Taiataila, Sadis, Piladelpia, di Leodisia.”

¹² Vya tige nêl bêge, om a pilepac a ên a nêb a ob xê xomxo tyo wê nêl kiyang tige vô a ge. Om a pilepac, lêc a xê lam gol vigê vilu di sec yuu, ¹³ di a xê xomxo ti le vac lam mahigun. Xomxo tige tiyi xocbê xomxo nu, di vinyum ngakwi dia ti, di vêx let gol ti lec yagtôv xôn, ¹⁴ di bazub lihi kwem tiyi xocbê bwoc sipsip niviluhu hixôn vîyobtoc ge, di mangiluhu linac xocbê ngwax, ¹⁵ di vîxa tiyi xocbê ain wê xomxo si lec ngwax mi i vô hi ge, di vya nididun levac xocbê mia levac didun, ¹⁶ di xomxo tyo hôm pitua vigê vilu di sec yuu vac vigê hîyôv, di yipac levac wê xônên manôn vilu vilu ge yêp vac mya, di manôn linac tiyi xocbê hîyôv linac myapîlihi.

¹⁷ A xê bêge, om a xona di vîxog mi la xêp kibun vac i vîxa kwa ngibi xocbê a xib ge. Mêlêc i vyax vigê hîyôv lec a di nêl vô a ên nêbê, “Ông xonaên i ma, ên a xomxo mugên di timuên, ¹⁸ di a dô magvîha. Ilage a xib, lêc a kidi lec magvîha tii vac nang. Om wê lê, a obêc dô magvîha luta lêc luta, di a kô ki wê Seten ben hixôn yibên ge. ¹⁹ Om ông kivuu kiyang lec susu wê ông wê pyap gwêbaga di susu wê a obêc hilung vô ông timuên ge hixôn. ²⁰ Ông wê pitua vigê vilu di sec yuu wê

dô vac a vigêg hîyôv ge hixôn lam gol vigê vilu di sec yuu. Susu tigae xocbê kiyang pilepacên, léc a ob nêl kehe kitong vô ông. Lam gol vigê vilu di sec yuu ge kehe bêga ên nêbê konglegesen vigê vilu di sec yuu. Di pitua vigê vilu di sec yuu ge kehe bêga ên nêbê konglegesen vigê vilu di sec yuu ge he nên bazub.”

2

Kiyang la vô konglegesen Epesas

¹ Yesu nêl vô a, Jon, bêga ên nêbê, “Ông kivuu a kiyang ga i loc vô xomxo wê tu konglegesen Epesas nên bazub ge bêga bê a ga wê a hôm pitua vigê vilu di sec yuu vac vigêg hîyôv, di a vilee vac lam gol vigê vilu di sec yuu gee mahigun. ² A nêl vô xam Epesas bêga bê a xovô môp vihati wê xam vông ge hixôn yuac levac wê xam vông ge, di a xovô ên a nêbê xam mi le xêkizêc vac viyin, di xam xêmyaa o vin lec xomxo nipaên lêm. Ên he kityoo ên he nêbê he êno tu sinale, léc xam yaxên kiyang wê he vông ge pyap, om xam xovô ên xam nêbê he o sinale lêm. Nge, he xomxo kityooên. ³ A xovô ên a nêbê xam mi kilê viyin lec a lêg di le xêkizêc vac viyin tige, di xam o sea vông vinên wê xam vông ge lêm, di xam nim o ma lec yuac wê a vông ge lêm. ⁴ Léc kiyang ti yêp bêga ên nêbê ilage wê xam vông i vin a paha ge, xam xêmyaa vin lec a nôl, léc gwêbaga xam xêmyaa o vyac vin lec a tiyi xocbê ilage lêm. ⁵ Om xam léc xovô môp wê xam vông vô a ilage i tii vac, di pilepac nilôm i loc vô yuac nivaha wê xam vông taxlee ge. Léc xam obêc pilepac

xam lêm ge od a obêc val vô xam nêc lam gol vêl. ⁶ Lêc a xê xam môp nivihã ti yêp bêga nêbê xam xêmyaa o vin lec môp nipaên wê Nikolas he nue vông ge lêm. A êno, a xêgyaa o vin lec môp tibêge lêm.

⁷ “Xam ninyam obêc yêp ge od xam ngô kiyang ga wê Myakilôhô Ngibua nêl vô xomxo vông vinên vac vîgwe vîhati gee. Xomxo ti obêc vông vevac vô môp nipaên mi pwoo i pec ge od a obêc lee yuu ên i yul xax nôc wê ob dô mavihã ya ge mi ya. Xax tige Anutu yev i le vac vîgwe paladis.”

Kiyang la vô konglegesen Smena

⁸ Nang dêc Yesu nêl vô a, Jon ên nêbê, “Ông kivuu a kiyang ga i loc vô xomxo wê tu konglegesen Smena nêc bazub ge bêga bê a xomxo mugên di timuên wê a xib lêc kidi lec magvihã nang ge. ⁹ A nêl vô xam Smena bêga bê a xovô vîyin wê tulec xam ge di a xovô ên a nêbê xam nêc susu maên, lêc Anutu vông vizid tibeac vô xam. Di a xovô kiyang nipaên wê xomxo ya nêl lec xam ge. He kityoo ên nêbê he xomxo Yuda, lêc he o xomxo Yuda lêm. Nge, he tibii wê Seten viac he ge. ¹⁰ Om le i lêc xona ên vîyin wê obêc val vô xam ge lêm. Wê lê, Seten nue obêc tung xam ya la vac xumac kalabuhu ên nêb he obêc yaxên xam. Om xam obêc kilê vîyin i tiyi buc vîgê yuu. Lêc xam obêc kilê vîyin di vông i vin xêkizêc ta di wib hixôn ge od a obêc vông nôc nivihã wê mavihã dôc vô xam.

¹¹ “Xam ninyam obêc yêp ge od xam ngô kiyang ga wê Myakilôhô Ngibua nêl vô xomxo vông vinên vac vîgwe vîhati gee. Xomxo ti obêc

vông vevac vô môt nipaên mi pwoo i pec ge od yibên ngwe wê vông yuu ge obêc vông i vô nipaên lêm.”

Kiyang la vô konglegesen Pegamam

¹² Nang dêc Yesu nêl vô a ên nêbê, “Ông kivuu a kiyang ga i loc vô xomxo wê tu konglegesen Pegamam nêl bazub ge bêga bê a ga wê a hêm yipac levac wê xônên manôn vilu vilu ge. ¹³ A nêl vô xam Pegamam bêga bê a xovô xam bom. Seten tu levac vac xam bom. Mêlêc a xovô ên a nêbê xam mi hêm a lêg xôn di vông i vin xêkizêc di xam o yax vông vinên wê xam vông ge vun lêm. Ilage xomxo vông vinên ti lê nêbê Antipas dô hixôn xam di nêl kiyang wê a vông ge vô xam di o sea kiyang wê a vông ge ti lêm. Lêc tibii hi Antipas yib vac xam mahigun vac vigwe wê Seten tu levac vac ge di xam wê. Lêc xam o sea vông vinên wê xam vông ge lêm. ¹⁴ Mêlêc kiyang ya yêp bêga ên nêbê xam ya mi timu vô môt nipaên wê Belam vông ilage. Belam hilung môt kityooên vô xomxo ngwe lê nêbê Belak, di Belak hilung môt nipaên tige vô xomxo Islel om he ya susu yaên wê tibii vông i tu daa vô anutu kityooên wê mayibên ge, di he vông môt yôdac vêx yuu vux hixôn. Lêc gwêbaga xam ya mi timu vô môt soên bêge. ¹⁵ Di xam ya mi timu vô kiyang nipaên wê Nikolas he nue nêl ge. ¹⁶ Mêgem xam pilepac nilôm i loc vô môt nivîha, lêc obêc ma ge od a obêc miloc vô xam lutibed di hi he wê hêm môt nipaên xôn ge ya yipac levac wê yêp vac a myag ge.

17 “Xam ninyam obêc yêp ge od xam ngô kiyang ga wê Myakilôhô Ngibua nêl vô xomxo vông vinên vac vigwe vihati ge. Xomxo ti obêc vông vevac vô môp nipaên mi pwoo i pec ge od a obêc vông yaên lag puunê lê nêbê mana wê dô xôpacên ge vô i ên i ya, di a obêc vông ngidax kwem ti vô i di kivuu i lê paha lec ngidax tyo, di xomxo bangwe ob xovô lê paha tige lêm. Nge, xomxo ti wê lê yêp lec ngidax tige vaci obêc yê di xovô.”

Kiyang la vô konglegesen Taiataila

18 Nang dêc Yesu nêl vô a ên nêbê, “Ông kivuu a kiyang ga i loc vô xomxo wê tu konglegesen Taiataila nên bazub ge bêga bê Anutu nu tuc a wê a magnîluhu linac tiyi xocbê ngwax ge di a vixag tiyi xocbê ain wê xomxo si lec ngwax mi i vô hi ge. 19 A nêl vô xam Taiataila bêga bê a xovô môp wê xam vông ge vihati, om a xovô môp xêyaa vin lecên hixôn môp vông vinên wê xam vông ge. Di a xovô ên a nêbê xam mi ngidu xomxo xôn, di xam le xêkizêc vac viyin, di gwêbaga xam vông yuac levac luu wê xam vông ilage vêl. 20 Mêlêc kiyang ti yêp vô xam bêga nêbê xam o sea vêx nipaên ti lê nêbê Jesebel ge lêm. Nge, xam vông i dô hixôn xam. Vêx tige kityoo ên nêbê i plopete ti, di kityoo a nuge yuac mi didii he la vac môp yôdac vêx yuu vux, di vông he ya yaên wê tibii vông i tu daa vô anutu kityooên ge. 21 A vông buc ya vô vêx tige ên a nêb i pilepac i, lêc vêx tige nêb ob pilepac i vêl ên môp yôdac vêx yuu vux lêm. 22 Om ngô lê, a obêc vông yidac levac vô vêx tige. Di he wê vông

yôdac vô i ge, he obêc pilepac he vêl ên môp nipaên lêm ge od a obêc vông myavinê mabu vô he, ²³ di a obêc hi vêx tyo nue yib. Mêgem xomxo vông vinên vac vîgwe vîhati gee ob yê mi xovô bêga bê a ga wê a yaxên xomxo vîhati piyôp yuu nilô mi xovô, di a obêc vông nipaên me nivîha vô xam toto i tîyi môp wê xam vông ge.

²⁴ “Lêc xam ya vac Taiataila ge, xam o timu vô kiyang kityooên wê Jesebel nêl ge lêm, di xam o xovô Seten piyôp wê yêp xôpacên vac i nilô ge lêm. Om a nêl vô xam ên a nêbê a obêc vông vîyin ngwe vô xam hixôn lêm, ²⁵ lêc xam hôm kiyang yuu yuac nôn xôn pîlihi mi dô di i loc tyip vô buc wê a obêc vena lec ge. ²⁶ Xomxo obêc vông vevac vô môp nipaên mi pwoo i pec di vông a yuac di i la tyip lec buc wê obêc yib ge od a ob vông i tu levac di i viac xomxo vac vîgwe vîhati. ²⁷ Om obêc hôm xax ain di viac he xêkizêc tîyi xochê xomxo hôm xax ain vac vîgê di hi dêg hibû sea ya ge. Yuac wê he viac ge tîyi xochê yuac wê Mag vông vô a ge. ²⁸ Di a ob vông pîtua wê vîgwe vidîiên ge vô xomxo tîgee.

²⁹ “Xam ninyam obêc yêp ge od xam ngô kiyang ga wê Myakilôhô Ngîbua nêl vô xomxo vông vinên vac vîgwe vîhati gee.”

3

Kiyang la vô konglegesen Sadis

¹ Nang dêc Yesu nêl vô a, Jon, ên nêbê, “Ông kîvuu a kiyang ga i loc vô xomxo wê tu konglegesen Sadis nêl bazub ge bêga bê a wê Anutu Myakilôhô Ngîbua vîgê vilu di sec yuu dô

hixôn a, di a hôm pitua vigê vilu di sec yuu vac vigêg.

“A nêl vô xam Sadis bêga bê a xovô xam nêl yuac. Xomxo pimil xam ên nêbê xam mi timu vô môp maviha. Lêc xam o timu vô môp tige lêm. Nge, xam timu vô môp mayibên. ² Om xam kidi lec di sea yêpên, di vông xam yuac wê xam sea ge i yêp nivîha i tii vac, ên a o xê xam yuac ti nivîha vô Mag Anutu manôn lêm. ³ Ilage xam ngô kiyang tige mi xovô. Om xam xovô kiyang tige i tii vac di hôm xôn pilihi, di pilepac xam. Lêc xam obêc kidi lec di sea yêpên mi pilepac xam lêm ge od a obêc val vô xam tiyi xochê tibii yôdac ge di xam ob xovô buc tige lêm. ⁴ Lêcom xam Sadis ya ge, xam o vông môp nipaên lêm, om tiyi xochê xam o vinyum ngakwi ningeac lêm. Om a xê xam tiyi wê xam obêc vinyum ngakwi kwem di lam dô hixôn a ge. ⁵ Xomxo ti obêc vông vevac vô môp nipaên mi pwoo i pec ge od a ob vông ngakwi kwem tibêge vô i mi i vinyum, di a ob kitya i lê vêl ên kipihac lêm. Kipihac tige nêl xomxo wê obêc dô maviha luta gee lê. Di a ob nêl xomxo tige lê kitong i yêp seac vô Mag, di a ob nêl i lê kitong vô Mag vông angela hixôn.

⁶ “Xam ninyam obêc yêp ge od xam ngô kiyang ga wê Myakilôhô Ngibua nêl vô xomxo vông vinên vac vigwe vihati gee.”

Kiyang la vô konglegesen Piladelpia

⁷ Nang dêc Yesu nêl vô a ên nêbê, “Ông kivuu a kiyang ga i loc vô xomxo wê tu konglegesen Piladelpia nêl bazub ge bêga bê a ga, a xomxo

ngibua di a kiyang nôñ kehe. A kô ki wê Devit vông ge. Om a obêc tax vuayen ge od ti o tiyi wê ob tung lec ge lêm, di a obêc tung lec ge od ti o tiyi wê ob tax i tii vac ge lêm. ⁸ A nêl vô xam Piladelpia bêga bê a xovô xam nêñ yuac, om wê lê. A vông vuayen ti le taxên vô xam mamnôn, di ti o tiyi wê ob tung lec ge lêm. A xovô êñ a nêbê xam nêñ xêkizêc tiyiên ma, lêc xam mi timu vô kiyang wê a vông ge di xam o yax a vun lêm. ⁹ Om ngô lê. Seten nue nêl êñ nêbê he xomxo Yuda, lêc he o xomxo Yuda lêm. Nge, he xomxo kityooên. Om a obêc vông he i loc yêp vac xam kwa ngibi êñ he i xovô bê a xêgyaa vin lec xam. ¹⁰ Xam mi le xêkizêc vac viyin tiyi xocbê a nêl vô xam ilage. Mêgem a obêc vô xam vêl êñ viyin wê obêc val vô xam ge. Viyin tige obêc yaxên xomxo vihati wê dô kibun ga ge. ¹¹ A obêc mîloc vô xam lutibed, om xam hôm vông vinên wê xam vông ge xôn pîlihi êñ xomxo ti i o lêc vô nôñ nivîha wê Anutu vông vô xam ge vêl êñ xam lêm. ¹² Xomxo ti obêc vông vevac vô môt nipaên mi pwoo i pec ge od a obêc vông i le tiyi xocbê xax xêkizêc wê le vac Mag Anutu xumac ngibua nilô ge, di xomxo tige ob sea xumac ngibua nilô di lam lop mi la vêl lêm, di a ob kivuu Mag Anutu lê lec i di kivuu Mag Anutu vigwe levac lê lec i hixôn. Vigwe tige, Jêlusalem paha wê Mag Anutu obêc vông i lop mi lam gê lag puunê ge. Di a ob kivuu a lêg paha lec xomxo tyo hixôn.

¹³ “Xam ninyam obêc yêp ge od xam ngô kiyang ga wê Myakilôhê Ngibua nêl vô xomxo vông vinên vac vigwe vihati gee.”

Kiyang la vô konglegesen Leodisia

14 Nang dêc Yesu nêl vô a ên nêbê, “Ông kivuu a kiyang ga i loc vô xomxo wê tu konglegesen Leodisia nên bazub ge bêga bê kiyang nôn kehe a, di a mi nêl Anutu kiyang vihati ge yêp nivaha, di a o yax ti vun lêm, di susu vihati wê Anutu tung ge a tu kehe ên. 15 A nêl vô xam Leodisia bêga bê a xovô xam nêm yuac. Xam o dô tiyi xocbê mia ningigooên nivaha ge lêm di xam o dô tiyi xocbê mia nivinê nivaha ge lêm. A nêb xam dô i tiyi xocbê mia ningigooên nivaha me mia nivinê nivaha ge. 16 Lêc xam mi dô vac mia nivinê yuu ningigooên mahigun. Om a ob mutac xam vêl ên myag, 17 ên xam mi nêl ên xam nêbê, ‘Xe mone levac di susu tibeac, om susu ti o ma ên xe lêm.’ Xam mi nêl bêge, lêc xam dô nipaên tiyi wê xomxo ob xo vîgwe pisiv ên xam ge, di xam dô tiyi xocbê xomxo wê nên susu maên ge, di xam mamnôn toc di xam dô xêmtuac, lêc xam so ên xam nêb mêd xam dô nimviha. 18 Mêgem a vông xovôên vô xam bêga bê xam lam kisuu gol wê ngwax ya mi i vô paha ge vô a, ên a ob vông xam tulec vizid tibeac, di xam lam kisuu ngakwi kwem mi vinyum ên xomxo i o yê wê xam dô xêmtuac ge lêm ên ob vông ni yocên vô xam, di xam lam kisuu hizi wê xam ob lipac mamnôn ya ge ên xam mamnôn i seac di xam wê vîgwe i tii vac. 19 Xomxo wê a xêgyaa vin lec he ge, a nêl he nên nipaên kitong vô he di titô he. Om xam xovô môp wê xam vông ge di sea môp nipaên vihati i loc yêp xel, di pilepacxam mi vô paha lec. 20 Xam wê lê, a val le kwabo vô vuayen di

a hi vigêg lec xumac di keac. Om xomxo ti obêc ngô a vyag di lam tax xumac ge od a obêc la vac xumac lôma di la dô hixôn i, di xii xôn ob xa myam i yêp tived. ²¹ Xomxo ti obêc vông vevac vô môt nipaên mi pwoo i pec ge od a obêc tyuc lec di i dô lec sia king wê a vông ge hixôn a, tiyi xocbê a vông vevac mi pwoo nipaên pec ge od a la dô lec sia king hixôn Mag Anutu.

²² “Xam ninyam obêc yêp ge om xam ngô kiyang ga wê Myakilôhô Ngibua nêl vô xomxo vông vinên vac vigwe vihati gee.”

4

He pimil Anutu gê lag puunê

¹ Kiyang wê a kivuu vô konglegesen ge tiyôô, mêdec a, Jon, a xê mag la kisiinê, lêc a xê vuayen wê le taxên gê lag puunê ge. Di vya wê a ngô taxlee tiyi xocbê vuac tyuc ge, a ngô vya tige tii vac, di vya tyo nêl vô a ên nêbê, “Ông lec lam kisii ga lê, lêc a obêc hilung buc wê obêc val timuên ge vihati vô ông.” ² Mêdec lutibed Myakilôhô Ngibua lam hivun a xôn di a xê mag la sia king ti gê lag puunê di xomxo ti dô lec. ³ Xomxo tige wê dô lec sia king ge linac xêseac tiyi xocbê ngidax kwem lê nêbê jaspâ hixôn ngidax hi ngwe lê nêbê konilian. Vilub koo di buu vô sia king tige di a xê tiyi xocbê ngidax niyuu lê nêbê emelal. ⁴ Di sia 24 le i vivac vô xomxo ti wê dô lec sia king tige, di gyovixa 24 dô lec sia tige. Di he vinyum ngakwi kwem di tung kilung gol tiyi xocbê king mi tung ge lec bazub. ⁵ Sia king tige tiyi xocbê deac hixelac di tug di vô

didun levac, di ngwax tumên vigê vilu di sec yuu tum mi le vô sia king manôn. Ngwax vigê vilu di sec yuu gee tiyi xocbê Anutu Myakilôhô Ngibua vigê vilu di sec yuu. ⁶ Susu ti tiyi xocbê gwec ge yêp vô sia king manôn, di gwec tige xêseac ta tiyi xocbê deac ge.

Lilii maviha yuudiyuu buu sia king tige. Ti le vô manôn di ti le vô nimi di yuu le vilu vilu. He mangiluhu tibeac dô lec he ninivi vihati, ⁷ di lilii maviha ti xocbê noo laion, di ti xocbê bwoc levac, di ti xocbê xomxo, di ti xocbê tul wê mi bôb mi la kisii ge, ⁸ di he toto ge vinihi vigê vilu di sec ti, di he mangiluhu tibeac hivun he ninivi yuu nilô xôn, di he mi vông lilo tiyi bucên yuu vidiiên vihati bêga ên nêbê,

“Apumtau Anutu xêkizêc kehe ông, ông ngibua, ông ngibua, ông ngibua, di ông dô mugên ilage, di dô gwêbaga, di ông obêc dô luta léc luta.”

He nêl kiyang tibêge di o vông mahigun vac lêm.

⁹ Anutu ge wê dô lec sia king mi dô maviha luta léc luta. Di lilii maviha yuudiyuu gee mi nêl Anutu xêseac kitong, di vông i lê vô levac, di pimil i. Buc vihati wê he vông bêge ge ¹⁰ od gyovixa 24 tige la yêp kipôm manôn vac kibun vô Anutu wê dô lec sia king mi dô maviha luta léc luta ge di pimil i, di nêx he kilung gol la dô vô sia king manôn di nêl ên nêbê,

¹¹ “O Apumtau, xe Anutu ông. Ông tiyi wê xomxo ob nêl xêseac wê ông vông ge kitong, di vông ông lêm i vô levac, di dô vac xêkizêc wê ông vông ge kwa ngibi,

ên ông tung susu vihati ya xovôên wê ôcông va vông ge, mêgem susu tyoe dô gwêbaga.”

5

Jon yê kipihac ti

¹ A xê wê Anutu dô lec sia king ge, di i hôm kipihac ti vac vigê hiyôv, léc kiyang yêp vac nilô di yêp lec nimi hixôn. Di he vilun kipihac xôn di pitii ya tep vigê vilu di sec yuu. ² Mêdec a xê angela xêkizêc ti keac vya levac bêga ên nêbê, “Letya nivîha tiyi wê ob tax tep di tidii kipihac tiga?” ³ Angela nêl bêge, léc xomxo wê dô lag puunê, di he wê dô lec kibun, di he wê yib di dô vac kibun nilô gee, ti o nivîha tiyi wê ob tidii kipihac tyo mi yê di kitong ge lêm. ⁴ Di a xê wê he o tulec xomxo ti tiyi wê ob tidii kipihac mi kitong ge lêm, om vông a byag levac. ⁵ Mêdec gyovîxa ti nêl vô a ên nêbê, “Le i byag lêm. Ngô lê. Xomxo ti wê xêkizêc tiyi xocbê noo laion ge pum lec kehe Yuda, di Devit ge i bu ilage. Xomxo tyo vông vevac vô môp nipaên mi pwoo i pec om tiyi wê obêc tax tep vigê vilu di sec yuu ge vêl di tidii kipihac tyo.”

Jon yê Yesu xocbê bwoc Sipsip Nu ti

⁶ A xê Anutu sia king wê lilii mavîha yuudiyuu le i buu ge, di a xê bwoc Sipsip Nu ti le vac sia king yuu gyovîxa mahigun, di bwoc Sipsip Nu tyo tiyi xocbê xomxo hi i yib ge, di i levac vigê vilu di sec yuu, di mangîluhu vigê vilu di sec yuu. Mangîluhu tige, ge Anutu Myakîlôhô Ngîbua vigê vilu di sec yuu wê i vông he la vac

vigwe vihati ge. ⁷ Mêdec bwoc Sipsip Nu tige la hêm kipihac wê yêp vô Anutu wê dô lec sia king ge vigê hiyôv. ⁸ Hêm kipihac pyap, mêdec lilii maviha yuudiyuu hixôn gyovixa 24 ge la yêp kipôm manôn vac kibun vô bwoc Sipsip Nu tyo. Gyovixa tigege toto hêm gita tiyi he vac vigê di hêm pile gol vac vigê tiyi he vihati. Ngwaxlu nivivea nivaha dô vac pile gol tigege mi pup lec vihati. Ngwaxlu nivivea nivaha ge xomxo vông vinên kitaaên wê he mi kitaa ge. ⁹ Mêdec he gyovixa vông lilo paha ti bêga ên nêbê,

“Ông nivaha tiyi wê ông ob hêm kipihac tyo di tax tep vêl ên ge. Ên xomxo hi ông wib ilage, di ông kisuu xomxo vêl ya hi wê ông vông ge di kitya he nê nipaên vêl, di vông he loc vô Anutu. Ông kisuu xomxo kehe toto, di vya toto, di ninivi toto, di xomxo vac vigwe toto ge hixôn, ¹⁰ di ông vông he tu il Anutu nue yuac, di i tu he nê levac, di he ob tu xomxo levac gê kibun.”

He pimil bwoc Sipsip Nu tige

¹¹ Pyap dêc a xê mag la, di a ngô angela tibeac vya. He tibeac wê tibeac tiyi xochê tausen yuu milion ge. Di he le ngivina sia king hixôn lilii maviha yuudiyuu di he gyovixa, ¹² di keac vya levac ên nêbê,

“Bwoc Sipsip Nu tiga wê xomxo hi i yib ge, i nivaha tiyi wê ob kô lê levac hixôn susu nivaha di xovôên yuu xêkizêc vihati, di i tiyi wê xomxo vihati ob nêl i lê i vô levac di nêl i xêseac kitong, di pimil i ge.”

¹³ Mêd a ngô xomxo hixôn susu wê Anutu tung ge vihati vya, he wê dô lag puunê di dô lec kibun di dô vac kibun nilô di dô vac gwec ge, he vihati nêl ên nêbê,

“Anutu wê dô lec sia king ge yuu bwoc Sipsip Nu tyo, il ob pimil yuu, di nêl yuu lê i vô levac, di nêl xêseac yuu xêkizêc wê yuu vông ge kitong i yêp luta lêc luta.”

¹⁴ Di lilii maviha yuudiyuu ge nêl ên nêbê, “Nôn!” Mêdêc gyovixa vihati la yêp kipôm manôn vac kibun vô yuu di pimil yuu.

6

Bwoc Sipsip Nu tige tax tep vigê vilu di sec ti vêl ên kipihac

¹ Pyap dêc bwoc Sipsip Nu tige hôm kipihac wê tep vigê vilu di sec yuu pitii xôn ge. Nang dêc a xê wê i tax tep taxlee tip. Mêd a ngô lilii maviha yuudiyuu ge ti tyuc vya levac tiyi xocbê deac tug ge di nêl ên nêbê, “Lam!” ² Di a xê mag la, lêc a xê xôhê kwem ti val, di xomxo ti dô lec di hôm vixev yuu vihol vac vigê. Mêdêc Anutu vông kilung ti vô i. Kilung tige, he mi vông vô xomxo wê vông vevac mi ngînoo ge. Xomxo tige la vông vevac mi ngînoo gwêbaga, di i yuac gên yêp wê ob vông vevac mi ngînoo xomxo tibeac vêl.

³ Nang dêc bwoc Sipsip Nu tyo tax tep ngwe wê vông yuu ge tip. Lêc a ngô lilii maviha ti wê vông yuu ge vya wê nêl ên nêbê, “Lam!” ⁴ Mêd xôhê ngwe wê ninivi hi ge ti val, di xomxo ti dô lec. Mêdêc Anutu vông xêkizêc vô i ên nêb i kitya môp malehe vêl ên vigwe vihati ên xomxo

i vông vevac vôma di hima mi yib. Om he vông yipac dia ti vô xomxo tige mi i kilê.

⁵ Nang dêc bwoc Sipsip Nu tyo tax tep ti wê vông yon ge tip. Nang di a ngô lili maviha ti wê vông yon ge vya wê nêl ên nêbê, “Lam!” Mêdêc a xê xôhò viliac ti val, di xomxo ti dô lec di hôm skel ti vac vigê vilu, ⁶ di a ngô vya ti lam vac lili maviha yuudiyuu gee mahigun bêga ên nêbê, “Ông yev plaua ya kap ti ên tibii i kisuu ya mone levac xocbê mone kehe ti, di yev pidi ya kap lu yon ên tibii i kisuu ya mone levac xocbê mone kehe ti. Lêc glis yuu mia ge mone i nipwo tyâ.”

⁷ Nang dêc bwoc Sipsip Nu tige tax tep ti wê vông yuudiyuu ge tip. Mêdêc a ngô lili maviha ti wê vông yuudiyuu ge vya wê nêl ên nêbê, “Lam!” ⁸ Di a xê xôhò zang ti val, di xomxo ti dô lec lê nêbê Yibên, di xomxo ngwe lê nêbê Vigwe Yibên ge timu vô i mi val. Mêd Anutu vông xêkizêc vô yuu ên nêb yuu i hibu xomxo vihati i loc dô kidu yuudiyuu, lêc hi kidu ti i yib di kidu yon i dô. Om yuu hi he ya yib ya yipac wê manôn vilu vilu ge, di vông vip i den ya mi he yib, di yidac kehe toto tulec he ya di he yib, di bwoc vimen kibun ga nga he ya ma vêl.

⁹ Nang dêc bwoc Sipsip Nu tyo tax tep ti wê vông vigê vilu ge tip. Mêdêc a xê xomxo yibên kinu dô vac alta ngibi. Ilage xomxo tigeê dô maviha di hôm xolac xôn pilihi di nêl i yêp seac, lêc tibii hi he yib. ¹⁰ Om he tyuc vya levac ên nêbê, “O Apumtau, xe king ông, ông ngibua, di kiyang nôn kehe ông. Buc vaba obêc lam la vêl di ông ob yaxên xomxo wê kipyax xe hi sea

ge nêñ kiyang di vông myaviwen vô he?” ¹¹ He kinêg bêge, mêdec Anutu vông ngakwi kwem dia vô he toto di nêl vô he êñ nêbê, “Xam dô seac vêl myabo lê, lêc tibii obêc hi xam lime yuac ya yib di hi xam lime ya yib hixôn, tiyi xocbê he hi xam wib ilage. Di obêc la pyap ge od a ob vông myaviwen vô he lec wê he kipyax xam hi sea ge.”

¹² Nang dêc bwoc Sipsip Nu tyo tax tep ti wê vông vigê vilu di sec ti ge tip. Mêdêc a xê ngiyêg levac ti yoc, di hiyôv vô viliac tiyi xocbê nivimihi viliac ge, di dentuc vô hi xocbê xomxo hi ge, ¹³ di pitua lag puunê tô mi lam kibun tiyi xocbê lea lilo xax nôñ wê huu ge toc mi lam kibun ge.

¹⁴ Mêd lag vilun xôn tiyi xocbê guhu vilunên ge mi la xôa ma, di kitôn wê le kibun ge hixôn kitôn wê le vac gwec mahigun ge vihati, he sea ben di la. ¹⁵ Mêd king wê dô kibun ge vihati hixôn xomxo levac, di tibii vevac wê levac ge, di xomxo wê susu tibeac ge, di he wê xêkizêc ge, di he wê tu xomxo nue yuac gee, di he wê viac nue yuac ge, he vihati yang pec mi la xôpac vac vu madia hixôn ngidax wê yux lec kitôn vac madia ge. ¹⁶ Di he tyuc la vô kitôn yuu ngidax êñ nêbê, “Lam tô lec xe mi hivun xe xôn êñ Anutu wê dô lec sia king ge manôn, êñ yêñ xe i ma, di lam hivun xe xôn êñ xêyaa myavinê wê bwoc Sipsip Nu tige vông ge, ¹⁷ êñ buc levac wê xêyaa myavinê wê Anutu yuu bwoc Sipsip Nu vông ge val gwêbaga, om letya tiyi wê ob le xêkizêc vac viyin tiga?”

7

Xomxo Islel 144,000 kô mak wê Anutu vông ge

¹ Pyap dêc a, Jon, a xê angela yuudiyuu wê le vô kibun myahîpu yuudiyuu ge. He hôm lea xôn vac kibun myahîpu yuudiyuu ên nêb lea i o lêc vivêê kibun yuu gwec me xax ti lêm. ² Angela yuudiyuu gee, Anutu vông xêkizêc vô he ên nêb he i vông kibun yuu gwec i vô nipaên. Mêdec a xê angela ba ti kidi vac viwen wê hiyôv tyip lam ge, di i hôm Anutu wê maviha ge susu ti wê ob vông mak lec xomxo ya ge, di i tyuc vya levac vô angela yuudiyuu gee ên nêbê, ³ “Xam o lêc vông kibun yuu gwec di xax i vô nipaên lutibed lêm. Nge, xe obêc vông mak lec xomxo wê tu Anutu nue yuac ge manôn tax lê. Nang dêc timuên xam vông kibun yuu gwec di xax i vô nipaên.” ⁴ Nêl bêge mêdec nêl kitong ên nêbê he ob vông mak lec xomxo Islel 144,000, di ob vinoa he vac Islel kehe vihati. ⁵ Mêgem 12,000 pum lec kehe Yuda, di 12,000 pum lec kehe Luben, di 12,000 pum lec kehe Gat, ⁶ di 12,000 pum lec kehe Asa, di 12,000 pum lec kehe Naptalai, di 12,000 pum lec kehe Manasa, ⁷ di 12,000 pum lec kehe Simion, di 12,000 pum lec kehe Livai, di 12,000 pum lec kehe Isakal, ⁸ di 12,000 pum lec kehe Sebyulan, di 12,000 pum lec kehe Josep, di 12,000 pum lec kehe Bensamin. He gee wê he kô mak wê Anutu vông ge.

Xomxo kidu levac ti pimil Anutu

⁹ Pyap dêc a xê mag la, lêc a xê xomxo tibeac kitucma mi dô, lêc he tibeac hiwocên, om o tiyi wê xomxo ti ob kitong he ge lêm. He lam vac vigwe toto, di kehe toto, di ninivi toto, di vya toto. Di he vinyum ngakwi kwem di le vô sia king yuu

bwoc Sipsip Nu tige manôn, di he vihati hôm bii lihi vac vigê, ¹⁰ di tyuc vya levac ên nêbê,

“Il nêd Anutu wê dô lec sia king ge hixôn bwoc Sipsip Nu tyo, yuu vô il vêl ên il nêd nipaên di vông il dô nidviha.”

¹¹ Mêdec angela vihati le i buu sia king yuu gyovixa di lilii maviha yuudiyuu, di he la le vô sia king manôn di la yêp kipôm manôn vac kibun vô Anutu, di pimil i bêga ên nêbê, ¹² “Vixôhilôg nô! Il obêc hi vixad ên il Anutu, di nêl xêseac wê i vông ge i yêp seac. Anutu tu xovôên nivaha vihati kehe, di il pimil i, di yong i lê i vô levac. Xêkizêc vihati ge yêp vô i, di xêkizêc vihati yang ge tu ici va xe di obêc yêp luta xel. Nôn.”

¹³ Mêdec gyovixa ti kinêg vô a ên nêbê, “Xomxo tigae wê vinyum ngakwi kwem gee, he letyae, di he lam gê na?” ¹⁴ Om a luu i vya bêga ên a nêbê, “Xomxo levac, a lungên di ôcông va xovô pyap.” Mêdec gyovixa tyo nêl vô a ên nêbê, “Xomxo tigae wê tibii vông myavinê levac vô he ên wê he vông i vin ge, om tiyi xochê bwoc Sipsip Nu lipac ngakwi wê he vông ge vô paha ya i hi. ¹⁵ Mêgem he le vô Anutu wê dô lec sia king ge manôn, di pimil i vac xumac ngibua tiyi bucên yuu vidiiên vihati, di Anutu vaci wê dô lec sia king ge obêc dô hixôn he di viac he. ¹⁶ Om vip ti ob den he lêm, di mia ob ma ên he lêm, di hîyôv ob ya he lêm, di susu ti obêc vô myavinê vô he ninivi lêm, ¹⁷ ên bwoc Sipsip Nu tige wê dô lec sia king ge obêc tu he nên xomxo wê ob viac he di didii he mi he la num mia maviha luta dôên ge, di Anutu obêc kitya he maluc vêl ên he manôn,

di he ob byag i tii vac lêm.”

8

Bwoc Sipsip Nu tige tax tep ti wê vông vigê vilu di sec yuu ge tip

¹ Nang dêc bwoc Sipsip Nu tige tax tep ti wê vông vigê vilu di sec yuu ge tip, om vigwe kisii ganê yêp didun maên tiyi xocbê hiyôv manôn vilubed. ² Di a xê angela vigê vilu di sec yuu wê mi le vô Anutu manôn ge, di he hôm vuac vigê vilu di sec yuu vac vigê.

³ Mêdec angela ti kô pile gol di la le vô alta, di Anutu vông susu nivivea niviha tibeac vô i ên nêb i kituc susu nivivea tyoe hixôn xomxo vông vinên nêb kitaaên, di la tung vihati xocbê daa lec alta gol wê le vô Anutu manôn ge. ⁴ Mêdec susu nivivea lu hixôn xomxo vông vinên nêb kitaaên lec vac pile wê angela hôm vac vigê ge di la vô Anutu. ⁵ Mêdec angela tyo hôm pile gol tige di tung ngwax wê dô lec alta ge vac pile mi i pup lec, di nêx i la lec kibun, mêdêc deac tug, di vigwe vô nididun, di deac hixelac, di ngiyêg yoc.

Angela yuudiyuu vê vuac

⁶ Nang dêc angela vigê vilu di sec yuu wê kô vuac vigê vilu di sec yuu gee viac he ên nêb he ob vê vuac tyoe.

⁷ Mêgem angela ti wê le mugên ge vê i vuac taxlee. Di Anutu vông yôg vac kibun hixôn xax vihati la kidu yon. Mêdec ais yuu ngwax hixôn hi tô mi la kibun di ya kibun hixôn xax kidu ti ma vêl, di kidu yuu yêp niviha. Di ngwax tige ya nita wê paha ge vihati ma vêl.

⁸ Nang dêc angela ngwe wê vông yuu ge vê vuac wê i vông ge. Mêdec Anutu nêx susu levac ti xochê kitôn wê ngwax tum lec ge la tô vac gwec, di vông yôg vac gwec la kidu yon, lêc kidu ti vô hi xochê xomxo hi ge, di kidu yuu yêp nivîha, ⁹ di Anutu hîbu lîlii maviha wê dô vac gwec ge la kidu yon, lêc kidu ti yib mîma vêl, di kidu yuu dô maviha, di he hîbu sip la kidu yon di kidu ti vô nîpâên, di kidu yuu le nivîha.

¹⁰ Nang dêc angela ti wê vông yon ge vê i vuac. Anutu hi mia tip la bo yon. Mêdêc pîtua levac ti wê tum xochê ngwax ge lam gê lag puunê di tô mî la kibun vac mia bo ti, di bo yuu yêp nivîha, di pîtua tige tô mî la vac mia wê yêp vac lôva ge vihati. ¹¹ Pîtua tyo lê nêbê kilin xochê pîxoho. Om vông mia kidu ti vô kilin, lêc kidu yuu dô nivîha. Xomxo tîbeac num mia kilin tige di yib mîma vêl.

¹² Nang dêc angela ti wê vông yuudiyuu ge vê i vuac. Anutu vông yôg vac hîyôv yuu dentuc di pîtua la kidu yonyon. Mêdêc hîyôv yuu dentuc di pîtua, kidu titi linacên ma, di kidu yuuyuu linac. Mêgem vô vidîiên yuu hucên ge, hîyôv kityê ti vô mapîtoc ta, di kityê yuu linac. Di vô bucên ge dentuc yuu pîtua kidu titi linacên ma, di kidu yuuyuu linac.

¹³ Nang dêc a xê tul ti bôb mî la kisii ganê, di a ngô menac tige tyuc vya xêkizêc bêga ên nêbê, “Axi! Axi! Axi! Angela yon gên dô, om yon obêc vê yon vuac ge od vîyin levac mabu obêc val vô vêx yuu vux vihati wê dô kibun ge.”

9

Angela ti wê vông vigê vilu ge vê vuac

¹ Nang dêc angela ti wê vông vigê vilu ge vê i vuac. Mêd a xê pítua ti hoo gê lag puunê di la kibun, di Anutu vông ki wê ob tax madia wê mapítoc ta ge vô pítua tige. ² Om tyo tax madia tyo, di ngwaxlu levac xocbê ngwax ya yuac ge lam tyip vac, di hìvun hìyôv yuu lag xôn di vigwe vô mapítoc ta. ³ Mêdêc hiveac tibeac lam vac ngwaxlu tige di lam la lec kibun. He kô xêkizêc tiyi xocbê kipyêc wê dô kibun ge. ⁴ Mêdêc kiyang la vô hiveac bêga ên nêbê, “Xam o léc vông nita yuu xax hixôn susu wê tyip lec kibun ge i vô nipaên lêm. Nge, xam loc vô xomxo wê Anutu mak o yêp lec he manôn lêm ge, di xam loc vông he i vô nipaên. ⁵ Om xam loc vông myavinê mabu vô he i tiyi dentuc vigê vilu, léc le i léc hi he i yib lêm.” Kiyang nêl bêge, di myavinê wê hiveac vông vô xomxo ge tiyi xocbê myavinê wê kipyêc

ving xomxo ge. ⁶ Vô buc tige xomxo ob myag môt wê he ob yib lec ge, léc he ob yêvô môt ti lêm, di he xêyaa ob vin lec nêb he ob yib, léc he ob yib lêm.

⁷ Hiveac tige, he tiyi xocbê xôhô wê xomxo viac pyap nêb ob la vevac ge. Susu ti xocbê kilung gol ge dô lec he bazub, di manôn tiyi xocbê xomxo manôn ge, ⁸ di bazub lihi dia xocbê tibii vêx bazub lihi ge, di nivu tiyi xocbê noo laion nivu ge, ⁹ di nivu tiyi xocbê ngakwi ain, di he vinihi vô nididun levac tiyi xocbê pêt nipwo tibeac wê xomxo dô lec di xôhô didii mi la vevac

ge. ¹⁰ Di he xêxuhu tiyi xochê kipyêc xêxuhu ge di mya kilin wê ob vîng xomxo ya ge dô vac he xêxuhu. Om xêkizêc wê he vông ge kehe yêp vac he xêxuhu, om ob vông myavinê vô xomxo tiyi dentuc vigê vilu. ¹¹ Angela tige wê viac madia mapitoc ta ge tu hiveac tigeenên king. Vac Hiblu vya angela tyo lê nêbê Abadon, di vac Glik vya lê nêbê Apolion. Lê tige kehe bêga ên nêbê xomxo ti wê ob kitya susu hixôn xomxo vêl ge.

¹² Mêgem viyin wê mugên wê hiveac vông ge tiyô. Om wê lê, viyin yuu obêc val timuên hixôn.

Angela ti wê vông vigê vilu di sec ti ge vê i vuac

¹³ Nang di angela ti wê vông vigê vilu di sec ti ge vê i vuac. Mêd a ngô vya ti lam vac alta gol levac dia yuudiyuu. Alta tige le vô Anutu manôn.

¹⁴ Vya tyo nêl vô angela ti wê vông vigê vilu di sec ti wê hêm vuac ge ên nêbê, “Pîwelac angela yuudiyuu wê he ku xôn vac mia levac Yupletis ge di vông he loc.” ¹⁵ Om angela tige pîwelac he yuudiyuu gee, di vông he la ên nêb he i loc hibu xomxo vihati ge i loc kidu yon, di he i hi kidu ti i yib, di kidu yuu i dô mavîha. Ilage angela tyoe viac he pyap di he dibin klismas di dentuc di buc hixôn hiyôv manôn wê he ob vông vevac lec ge.

¹⁶ Om he didii nue vevac wê dô lêc xôhê ge mi la. Xomxo vevac tigeenêbeac hiwocên tiyi xochê 200 milion ge, di a ngô wê he nêl he naba tibêge.

¹⁷ Di a xê xochê a xê vîvia, lêc xomxo vevac tigeenêbeac dô lec xôhê. Xomxo tigeenêbeac vînyum ngakwi ain lec pikopac xôn di ngakwi tigeenêbeac manôn hi yuu niyuu di zang, di xôhê wê he dô lec ge bazub tiyi xochê

noo laion ge, di ngwax yuu ngwaxlu yon ngidax salpa wê ngwax tum vac ge, yon xôn lam vilup vac xôhô mya mi la. ¹⁸ He hi xomxo kidu ti yib ya susu nipaên yon ge, di kidu yuu dô maviha. He hi xomxo ya ngwax yuu ngwaxlu yon ngidax salpa wê lam vac xôhô mya ge. ¹⁹ Xêkizêc wê xôhô vông ge yêp vac he mya yuu xêxuhu. He xêxuhu tiyi xocbê myel lêc bazub le lec, di he mi vông vevac ya xêxuhu yuu bazub.

²⁰ Om susu nipaên yon ge hi xomxo ya yib. Lêc he wê gên dô maviha ge, he o pilepac he ên môm nipaên wê he vigê mi vông ge lêm, di he o sea môm wê he mi kitaa vô vimwo nipaên di kitaa vô anutu kityooên kinu ge lêm. Kinu tige wê he vông ya gol di silva di ain di ngidax di sev ya xax, om kinu tige o tiyi wê ob yê vigwe di ngô kiyang di la vac vigwe ya ge lêm. ²¹ Di xomxo tige mi hi xomxo yib di vông môm yevac di môm yôdac vêx yuu vux, di vông yôdac vô xomxo susu. Lêc he o pilepac he di vô nîmi vô môm nipaên tibêgee lêm.

10

Angela vông kipihac nipwo ti vô Jon mi i ya

¹ Pyap dêc a xê angela xêkizêc ti lop mi lam gê lag puunê, lêc vîyobtoc hivun i xôn, di vilub koo mi yêp lec bazub kisii, di manôn linac xocbê hîyôv ge, di vîxa yuu xôn tiyi xocbê teac di ngwax tum lec. ² Di i hôm kipihac nipwo wê tidii pyap ge ti vac vigê, di lax vîxa vilu hîyôv la vac gwec, di lax vîxa vilu kêd la lec kibun kisii, ³ di i tyuc vya levac tiyi xocbê noo laion vô vya ge. Tyuc

pyap di deac vigê vilu di sec yuu gee tug di nêl kiyang. ⁴ Deac vigê vilu di sec yuu gee tug di nêl kiyang pyap, om a nêb a ob kivuu kiyang wê he nêl ge, mêlêc a ngô vya ti lam gê lag puunê bêga ên nêbê, “Le i lêc kivuu kiyang wê deac vigê vilu di sec yuu gee tug di nêl ge lêm. Nge, i yêp xôpacên vac ôcông va piyôp.”

⁵ Mêdêc angela ti wê a xê pyap wê vixa vilu le vac gwec di vilu le lec kibun ge, angela tyo hilung vigê hiyôv la kisii ⁶ ên nêb ob nêl kiyang vixôhilôg nôn lec Anutu wê dô maviha luta lêc luta ge lê. Anutu tung lag hixôn susu wê dô vac ge, di tung kibun hixôn susu wê dô lec ge, di tung gwec hixôn susu wê dô vac ge. Om angela tyo nêl bêga ên nêbê, “Buc val pyap, om Anutu obêc bin buc ngwe hixôn lêm. ⁷ Nge, angela ti wê vông vigê vilu di sec yuu ge obêc vê i vuac ge od Anutu obêc vông kiyang xôpacên wê vông vô nue yuac plopete mi he nêl mi i yêp seac ilage vô nôn lec.”

⁸ Angela nêl bêge, mêdêc vya ti wê lam gê lag puunê mi a ngô ilage nêl vô a tii vac ên nêbê, “Loc hôm kipihac nipwo ti wê tidii pyap mi yêp vac angela vigê ge vêl. Angela tige wê vixa vilu le vac gwec di vilu le lec kibun.” ⁹ Om a la vô angela tyo mi la nêl vô i ên a nêbê, “Vông kipihac tiga vô a.” Om i nêl vô a ên nêbê, “Hôm kipihac tiga mi loc wa. Di ob vô nyen vac ông myam tiyi xochê vinoluc ge di ob la dô vac xêmyaa di obêc kilin.” ¹⁰ Mêdêc a kô kipihac nipwo tige vac angela tyo vigê di xa i ma vêl, di kipihac vô nyen vac a myag, di a ngôn i la lê, lêc tyo la vô kilin levac vac a xêgyaa. ¹¹ Mêdêc angela tyo nêl vô a

ên nêbê, “Loc nêl Anutu kiyang i tii vac lec buc yuu susu vîhati wê obêc val timuên vô xomxo vac vigwe tibeac, di vya tibeac, di ob val vô king tibeac hixôn.”

11

Xomxo yuu nêl kiyang kitong

¹ Nang dêc Anutu vông pîtoa wê mi kô mak vô susu ya ge ti vô a, di nêl vô a ên nêbê, “Kidi lec mi loc kô mak vô Anutu xumac ngîbua yuu alta di kitong xomxo wê dô vac xumac ngîbua nilô mi kitaa ge. ² Lêc xumac ninyawehe ge, le i lêc kô mak vô hixôn lêm. Nge, ông sea i yêp xel, ên a vông vô tibii madîluhu, om he ob kê vigwe ngîbua Jerusalem vô nipaên tiyi xocbê dentuc 42 ge. ³ Di a obêc vông xêkizêc vô a nuge yuac yuu ên yuu i loc nêl kiyang wê a vông ge vô xomxo. Om yuu obêc vêx nivimihi wê xomxo mi vinyum lec buc wê he dô vac viyin ge, di yuu obêc la nêl kiyang wê a vông ge i tiyi buc 1,260.” Angela nêl bêge, di buc 1,260 ge tiyi xocbê klismas yon di dentuc vigê vilu di sec ti ge.

⁴ Xomxo yuu ge tiyi xocbê xax oliv yuu di lam yuu wê le vô Apumtau wê viac kibun vîhati ge manôn. ⁵ Lêc tibii obêc nêb vông yuu i vô nipaên ge od ngwax obêc tum vac yuu mya di ya tibii vevac tîgee i ma. Vixôhilôg, tibii obêc vông nipaên vô yuu ge od ngwax obêc ya he yib. ⁶ Xêkizêc wê yuu vông ge tiyi wê yuu ob kol lag lec di lun valên ob ma i tiyi buc vîhati wê yuu ob nêl Anutu xolac ge. Di xêkizêc wê yuu vông ge tiyi wê yuu ob pilepac mia di i vô hi xocbê

xomxo hi ge, di xêkizêc wê yuu vông ge tiyi wê yuu ob vông xomxo vô nipaên ya viyin kehe toto ge. Om tiyi buc vihati wê yuu obêc nêb vông viyin tibêge ge od yuu obêc vông.

⁷ Yuu obêc nêl Anutu kiyang pyap ge od bwoc vimen ti obêc lec vac vu madia wê mapitoc ta ge mi val tyip, di ob vông vevac vô yuu di nginoo yuu vêl di hi yuu yib, ⁸ di yuu ninivi ob yêp vac môp levac vac vigwe levac Jerusalem wê nêl kiyang pilepacên nêbê Sodom yuu Isip. Vigwe levac Jerusalem wê ilage tibii hi Apumtau wê yuu vông ge yib lec xax. ⁹ Mêdêc xomxo ya vac ninivi toto di kehe toto di vya toto di vigwe toto ge, he ob yê yuu ninivi tiyi buc yon diluhu di buc ti viwen hixôn, di he ob tyuc lec nêb xomxo i o yev yuu lêm. ¹⁰ Om xomxo kibun ga vihati xêyaa ob vô nivîha ên wê plopete yuu ge yib, om he ob yoo di myêl levac mi ya di vông susu nivîhaviha voma, ên yuu nêl xomxo kibun ga nêl nipaên lec he manôn di vông viyin vô he.

¹¹ Mêdêc buc yon yadiluhu di ti viwen lam la vêl lê, lêc Anutu vê myakilôhò maviha la vac yuu nîlô di yuu kidi lec maviha mi le kisii, di xomxo vihati wê yê yuu ge xona mabu ên yuu. ¹² Mêdêc vya levac ti lam gê lag puunê di lam vô yuu bêga ên nêbê, “Muu lec mi lam kisii ga.” Mêgem yuu lec vac viyobtoc mi la lag puunê di xomxo wê vông vevac vô yuu ge yê wê yuu lec mi la ge. ¹³ Mêdêc lutibed ngiyêg levac yoc di kipê vigwe levac tige mya ti vêl, di mya vigê vilu di sec yuudiyuu gên le nivîha. Ngiyêg tige hi xomxo 7,000 yib, di he wê gên dô maviha ge xona mabu

yocên, om pimil Anutu lag puunê.

¹⁴ Om viyin levac ti wê vông yuu ge val pyap. Om ngô lê, viyin levac ti wê vông yon ge obêc val lutibed.

Angela ti wê vông vigê vilu di sec yuu ge vê i vuac

¹⁵ Nang dêc angela ti wê vông vigê vilu di sec yuu ge vê i vuac di vya ya lam gê lag puunê di tyuc xêkizêc bêga nêbê,

“Il Apumtau Anutu hixôn Kîlisi, yuu tu king wê xomxo kibun vihati vông, di ob tu king wê ob dô luta lêc luta

ge.”

¹⁶ Nêl bêge mêdêc gyovixa 24 wê mi dô lec sia wê le vô Anutu manôn ge, he kipôm manôn vac kibun di pimil Anutu ên nêbê,

¹⁷ “Apumtau Anutu, ông xêkizêc kehe, ông dô mugên ilage, di dô gwêbaga hixôn. Ông kô xêkizêc wê ông vông ge lec pyap di ông ob tu xomxo vihati nêc king, om xe ob pimil ông. ¹⁸ Tibii madiluhu xêyaa vô myavinê vô ông, lêcom ông êno ge, ông xêmyaa vô myavinê vô he pyap. Om gwêbaga buc wê ông ob yaxên xomxo yibên nêc kiyang ge val, di buc gwêbaga wê ông obêc vông nôn nivîha vô nume yuac, he wê tu plopete hixôn xomxo vông vinên vihati, di he wê xona ên ông di la vac ông kwa ngibi, di he wê lê levac di he wê o le levac lêc ge vihati. Di buc gwêbaga wê ông obêc kitya he wê vông xomxo hixôn kibun vô nipaên ge

vêl.”

¹⁹ He nêl kiyang tige pyap, mêdêc Anutu xumac ngibua lag puunê tax mi le myadongên, di Anutu kilong yêp seac vac xumac ngibua tyo nilô. Kilong tige tiyi xocbê kiyang wê Anutu hilu pyap ilage. Mêdêc deac hixelac, di vigwe vô nididun, di deac tug, di ngiyêg yoc, di lun tiyi xocbê hikwelac kwem ge tô hixôn.

12

Vêx ti yuu myel levac ti kiyang

¹ Nang dêc do levac lag puunê ti val le seac bêga nêbê vêx ti dô, lêc vinyum hiyôv lec ninivi xocbê ngakwi ge, di dentuc dô vac vixa ngibi, di pitua vigê yuu di tô mi la yuu ge dô lec bazub tiyi xocbê kilung ti. ² Vêx tyo nu dô vac xêyaa, lêc kê ên nêb ob yubac, om ta yaxên myavinê levac di iac mabu. ³ Nang dêc do levac lag puunê ngwe val bêga nêbê myel levac mabu ti yêp. Myel tige ninivi hi, di bazub vigê vilu di sec yuu, di levac vigê yuu le lec bazub, di kilung vigê vilu di sec yuu xocbê kilung wê king mi tung ge dô lec bazub toto. ⁴ Myel tige xêxuhu pitjep pitua kidu ti ma vêl di nêx he la lec kibun, di pitua kidu yuu ge dô vac lag. Mêdêc myel tige la le vô vêx tyo wê ob kô nu ge manôn ên nêb nipwo tige obêc yubac ge od ob ya. ⁵ Mêdêc vêx tyo kô nu vux ti. Vô buc timuên wê nipwo tyo obêc vô levac ge od obêc hôm xax tiyi xocbê ain ge vac vigê di viac xomxo vihati ya. Nu tyo yubac om myel tige nêb ob ya, lêc he kô i mi la vô Anutu lec i sia king. ⁶ Vêx tyo pec mi la vac vigwe myadongên

mi la dô vac vigwe ti wê Anutu viac pyap vô i ge, om he ob vông yaên vô i di viac i tiyi buc 1,260 (kliskas yon di dentuc vigê vilu di sec ti).

⁷ Mêdêc vevac levac tyip gê lag puunê. Maikel he nue angela vông vevac vô myel he nue angela nipaên, om he vông vevac vôma. ⁸ Lêc Maikel he nue angela luu myel he nue vêl, om myel he nue tiyiên ma wê ob dô lag puunê ge. ⁹ Om Maikel he nue angela nêx myel levac tyo lam kibun. Myel tige dô ilage, di lê ngwe nêbê vimwo nipaên Seten, di lê ngwe nêbê Devil wê mi nêl kiyang kityooên vô xomxo kibun ga vihati. Lêc Maikel he nue angela nêx myel nipaên tige hixôn nue angela nipaên lam kibun.

¹⁰ Pyap dêc a ngô vya levac ti lam gê lag puunê bêga ên nêbê,

“Gwêbaga il Anutu vô il vêl ên xêkizêc wê myel nipaên vông ge, om xêkizêc wê Anutu vông ge yêp seac di i tu king wê il vông ge, di Kilisi wê i vông i lam ge tu levac, ên angela wê Anutu vông ge tii xomxo nipaên tyo lam kibun. Ilage xomxo nipaên tige mi le vô Anutu manôn tiyi vidiiên yuu bucên vihati, di nêl kiyang kityooên lec il lige vông vinên vô Anutu. Lêc angela wê Anutu vông ge nêx i lam kibun. ¹¹ Lêc hi wê bwoc Sipsip Nu vông ge kitya il lige nên nipaên vêl, om he nginoô Seten vêl, di he mi nêl Kilisi kiyang yêp seac, om he luu Seten vêl, ên he o vông nilô la vô môp wê nêb he ob dô nivaha ge lêm. Nge, he nêb xomxo obêc hi he yib ge od ge nivaha di

kiyang ti o yêp lêm. ¹² Mêgem ông vigwe kisii ganê hixôn xam vihati wê xam dô kisii ge, xam xêmyaa i nivihâ. Lêc xam kibun yuu xam gwec, xam xona nê m ên viyin levac ob val vô xam, ên Seten loc kibun pyap vô xam di xêyaa vô myavinê levac, ên xovô nêb i nêb buc wê Anutu obêc kitya i vêl ge val vô kwabo lec.”

¹³ Vya tyo nêl bêge, mêdêc myel levac tige yê wê he nêx i lam kibun ge, om la tii vêx tyo wê kô nu vux tige ên nêb ob hi i yib. ¹⁴ Lêcom Anutu vông tul levac vinihi yuu vô vêx tyo ên nêb i vinyum lec i di bôb mî loc kisii ya di sea myel i dô, di loc ben vac vigwe mahigun pileva ên he ob vet i ya yaên di viac i tiyi klismas yon di dentuc vigê vilu di sec ti. ¹⁵ Mêlêc myel tige mutac mia levac vac mya timu vô vêx tige vixa ên nêb i loc byêx vêx tyo i loc. ¹⁶ Lêc kibun ngidu vêx tyo xôn bêga nêbê sux mya di ngôn mia wê myel mutac i la ge, om o la hi vêx tyo lêm. ¹⁷ Mêdêc myel xêyaa vô myavinê vô vêx tyo, om loc mî la nêb ob la vông vevac vô vêx tyo nue. He gee wê mî timu vô Anutu xolac di vông i vin Yesu di nêl i kiyang yêp seac. ¹⁸ Mêdêc myel tige mîla le vô gwec nînya.

13

Bwoc vimen yuu val

¹ A xê bwoc vimen levac ti lam vac gwec. Bwoc vimen tige bazub vigê vilu di sec yuu, di levac vigê yuu le lec bazub, di kilung vigê yuu tiyi xochê kilung wê king mî tung ge dô lec levac toto,

di lê nipaên ti yêp lec bazub toto. Lê kehe bêga nêbê kiyang nipaên toto wê xomxo nêl vaxvax lec Anutu ge. ² Di bwoc vîmen wê a xê ge tiyi xocbê noo lepat, di vîxa xocbê noo bea vîxa ge, di mya xocbê noo laion mya ge.

Di myel levac vông xêkizêc wê i vông ge vô bwoc vîmen tige, di vông i tu levac xocbê ici va ge, di vông lê levac vô i. ³ Bwoc vîmen tige bazub vigê vilu di sec yuu, lêc ti vô nipaên tiyi xocbê xomxo nêx i yib ge. Lêc bazub tige vô nivîha lec nang, om xomxo vîhati yê di yetac ên i di he xêyaa vô nivîha di he la timu vô i vîxa. ⁴ Mêdêc xomxo yev vîxa kitu vô myel levac di pimil i, ên wê vông xêkizêc wê i vông ge vô bwoc vîmen tige. Om he yev vîxa kitu vô bwoc vîmen êno di nêl ên nêbê, “Letya vông xêkizêc tiyi xocbê bwoc vîmen tige? Di letya tiyi wê ob vông vevac vô i ge? Ti tiyiên ma vêl.”

⁵ Bwoc vîmen tige yong i di nêl kiyang nipaên lec Anutu. Di kô xêkizêc tiyi wê ob vông môp nipaên tibêgee i miloc tyip vô dentuc 42 i lam loc vêl. Di Anutu diyê ya manôn di o keac ti lec lêm. ⁶ Om bwoc vîmen tige nêl kiyang nipaên lec Anutu, om nêl kiyang nipaên lec Anutu lê di nêl lec Anutu ben di nêl lec Anutu nue wê dô kisii ganê. ⁷ Bwoc vîmen tige vông vevac vô xomxo vông vinên di ngînoo he vêl. Lêc Anutu diyê ya manôn di o nêl kiyang ti lec i lêm. Di bwoc vîmen kô xêkizêc wê ob tu king di viac xomxo kehe toto di ninivi toto di vya toto di vigwe toto ge. ⁸ Om xomxo wê he lê o yêp vac Anutu kipihac lêm ge, he vîhati ob yev vîxa kitu vô bwoc vîmen tige. Taxlee ilage wê Anutu gên o tung kibun hixôn

susu vîhati lêm ge od kivuu xomxo wê ob dô maviha luta léc luta ge lê yêp vac kipihac wê bwoc Sipsip Nu vông ge, ãi he tu i xe. Bwoc Sipsip Nu tige wê xomxo hi i yib ilage.

⁹ Xam ninyam obêc yêp ge od xam ngô kiyang tiga lê. ¹⁰ Anutu obêc lee yuu nêb xomxo ti i loc kalabuhu ge od ob la kalabuhu. ãi Anutu obêc lee yuu nêb xomxo ti i yib ya yipac ge od ob yib ya yipac. Om môp viyin tibêge obêc val ge od xomxo vông vinên he i le xêkizêc ta vac viyin ãi hêm vông vinên wê he vông ge xôn pîlihi.

¹¹ Nang dêc a xê bwoc vîmen ngwe val tyip vac kibun ãi lam le seac. Levac nipwo yuu tiyi xochê levac wê bwoc sipsip nu ti vông ge tyip lec bazub, ãi keacên wê i vông ge tiyi xochê myel levac vya. ¹² Mêdêc bwoc vîmen ngwe wê tax ge vông xêkizêc vô bwoc vîmen wê vông yuu ge ên nêb i vông yuac ya ãi i kidu xomxo vîhati ên nêbê he i yev vixam kitu vô bwoc vîmen ngwe wê tax ge. Bwoc vîmen ngwe wê tax ge wê bazub ti vô nipaên tiyi xochê xomxo hi i yib ge, léc vô nivîha lec nang. ¹³ Mêdêc bwoc vîmen ngwe wê vông yuu ge vông do tibeac. Do ti wê i vông ge bêga nêbê i le vô xomxo manôn ãi nêl ãi xomxo yê ngwax ti tum gê kisii ganê ãi lam tô lec kibun. ¹⁴ Anutu yê bwoc vîmen wê vông yuu ge ya manôn, ãi o keac ti lec lêm. Om bwoc vîmen tige vông do tibeac vô bwoc vîmen wê tax ge manôn, ãi kityoo xomxo tibeac ya do wê i vông ge, ãi nêl vô he ên nêbê, “Xam sev xax ti i tiyi xochê bwoc vîmen ngwe wê tax ge kinu, ãi xam yev vixam kitu vô. Ilage bwoc vîmen tige

yib ya yipac, léc kidi lec maviha tii vac nang.” Nêl bêge, om xomxo sev xax ti tiyi xocbê bwoc vimen kinu. ¹⁵ Anutu yê ya manôn di o nêl kiyang ti lec lêm. Om bwoc vimen ngwe wê vông yuu ge vê myakilôhô vac kinu tyo, om kinu tige keac. Di xomxo obêc yev vixa kitu vô kinu tige lêm ge od kinu tige obêc hi he yib.

¹⁶ Di bwoc vimen wê vông yuu ge nêl om xomxo vihati kô mak wê i vông ge lec he vigê hiyôv me he manôn, he wê lê levac hixôn he wê lê nipwo, di he wê mone yuu susu tibeac hixôn he wê nêl susu maên ge, di he wê tu levac di viac nue yuac ge hixôn he wê tu xomxo levac nue yuac ge. ¹⁷ Om bwoc vimen mak yuu naba ob yêp lec xomxo ti lêm ge od o tiyi wê ob la kisuu susu ge lêm di o tiyi wê ob vông susu mi tibii i kisuu ge lêm. Mak hixôn naba tige nêl bwoc vimen lê kitong. ¹⁸ Mêgem il ob xovô nivîha. Xomxo ti xovôên nivîha obêc yêp vô i ge od i kitong naba wê bwoc vimen vông ge di xovô kehe. Naba tige tiyi xocbê naba wê xomxo vông. Naba wê i vông ge tiyi xocbê 666.

14

Xomxo 144,000 vông lilo paha ti

¹ Nang dêc a Jon, a xê bwoc Sipsip Nu tige le lec kitôn ti lê nêbê Saion, di xomxo 144,000 le hixôn i. Bwoc Sipsip Nu lê di ma lê, yuu xôn lê yêp lec xomxo tige manôn. ² Mêdêc a ngô vya ti lam gê lag puunê. Vya tige wê nididun levac xocbê mia levac didun, di xocbê deac tug levac, di xocbê xomxo tibeac hi gita mi vông lilo vac ge.

³ Xomxo 144,000 gee le vô Anutu wê dô lec sia king ge manôn, di he le vô lili maviha yuudiyuu hixôn gyovixa 24 manôn hixôn, di he vông lilo paha ti. Xomxo 144,000 gee wê Anutu vô he vêl ên xomxo nipaên wê dô lec kibun ge mahigun di kô he mi la vô i. Xomxo tige vaci wê ob xovô lilo paha tige, di xomxo bangwe ob xovô lilo tige lêm.

⁴ Xomxo 144,000 gee, he o vông môp nipaên ti vô vêx lêm. Nge, he dô tiyi xocbê xomxo ngivih ge. Di vigwe vihati wê bwoc Sipsip Nu la vilee vac ge od he timu vô i vixa. Anutu vô he vêl ên xomxo kibun ga vihati di vông he lôm tu Anutu hixôn bwoc Sipsip Nu nue mugên. ⁵ He o nêl kiyang kityoên ti lêm, di nipaên ti o yêp vô he lêm.

Angela yon nêl kiyang

⁶ Nang dêc a xê angela ti bôb mi la kisii, di i la nêl xolac nivih wê obêc dô luta lêc luta ge vô xomxo kibun ga vihati. Om la nêl xolac vô xomxo vigwe toto, di xomxo kehe toto di vya toto di ninivi toto. ⁷ Om angela tige nêl vya levac ên nêbê, “Buc wê Anutu obêc yaxên xomxo vihati nêl kiyang ge val pyap. Om xam xona nêl ên i di pimil i, di yev vixam kitu vô i. Anutu ge wê tung lag yuu kibun di gwec yuu mia vihati ilage.”

⁸ Nang dêc angela ngwe wê vông yuu ge timu vô angela ngwe wê tax ge mi val, di nêl ên nêbê, “Vigwe levac Babilon vô nipaên. Vô nipaên pyap. Xomxo Babilon mi didii xomxo vac vigwe vihati ge la vac môp yôdac vêx yuu vux wê he mi vông ge, om tiyi xocbê tibii Babilon vông mia xêkizêc vô he ên nêb he i num di loc vac môp nipaên.”

⁹ Nang dêc angela ti wê vông yon ge timu vô angela yuu wê tax ge mi val, di nêl vya levac ên nêbê, “Xomxo ti obêc yev vixa kitu vô bwoc vimen hixôn i kinu di kô i lê tiyi xocbê mak lec manôn me vigê ge ¹⁰ od obêc num mia xêkizêc. Mia tige, Anutu xêyaa myavinê wê obêc vông vô he ge. Di Anutu obêc pilepac mia ningigooên vac mia xêkizêc tige lêm. Nge, xomxo obêc num xêyaa myavinê wê Anutu vông ge tiyi xocbê num mia xêkizêc ge. Om ngwax mahelac wê tum lec ngidax salpa ge obêc tum lec he di vông myavinê levac vô he, vô angela ngibua hixôn bwoc Sipsip Nu manôn. ¹¹ Di ngwax wê tum lec he di vông myavinê vô he ge, lu obêc la kisii luta léc luta. Om xomxo wê yev vixa kitu vô bwoc vimen hixôn i kinu di kô i lê tiyi xocbê mak lec he manôn me vigê ge, he obêc yaxên myavinê mabu tiyi buc vihati, vidiiên yuu bucên, di obêc dô seac vêl lêm.”

¹² Môt tibêge obêc val, om xomxo wê vông i vin Anutu di ngô i xolac di vông i vin Yesu ge, he i le xêkizêc.

¹³ Nang dêc a ngô vya ti lam gê lag puunê bêga ên nêbê, “Ông kivuu kiyang bêga bê gwêbaga di i loc vô buc vihati wê yêp timuên ge, xomxo obêc vông i vin Apumtau di yib vac vông vinên wê he vông ge od he obêc dô hixôn xêyaa nivihâ.” Vya nêl bêga, mêdêc Myakilôhô Ngibua tyuc lec ên nêbê, “Vixôhilôg nô. He ob sea he yuac levac wê he vông ge di lam dô seac vêl, di he obêc lam pileva lêm. Nge, yuac nivihâ wê he vông ge obêc lam hixôn he.”

Buc wê xomxo la kô susu yaên nôn wê huu ge

¹⁴ Nang dêc a xê mag la, lêc a xê viyobtoc kwem ti, di xomxo ti xocbê xomxo nu ge dô lec viyobtoc tyo. Xomxo tige tung kilung gol ti lec bazub di hôm yipac wê manôn ta ge ti vac vigê.

¹⁵ Mêdêc angela ti lam vac Anutu xumac ngibua wê dô kisii ganê ge di tyuc la vô xomxo ti wê dô lec viyobtoc ge ên nêbê, “Hôm ông yipac lec di loc vuv susu nôn wê huuên ge ya di kô mi loc, ên susu vihati wê dô kibun ge vô nôn pyap. Om gwêbaga buc wê ob la kôên nôn mi lam.”

¹⁶ Angela nêl bêge, mêgem xomxo ti wê dô lec viyobtoc ge hôm i yipac di la vuv susu nôn wê dô kibun ge vihati.

¹⁷ Nang dêc angela ngwe wê vông yuu ge lam vac Anutu xumac ngibua wê yêp kisii ganê ge, di i êno hôm yipac wê manôn ta ge ti. ¹⁸ Mêdêc angela ti wê vông yon ge sea alta mi lam. Angela tige kô xêkizêc wê ob viac ngwax ge. Mêdêc tyuc vya levac vô angela ti wê hôm yipac wê manôn ta ge ên nêbê, “Hôm ông yipac lec di loc kiku wain nôn wê dô kibun ge vêl ên yatôv di kituc i loc dô kidu ti, ên wain nôn huu mima vêl.” ¹⁹ Om angela tige hôm i yipac di la kiku wain nôn vêl ên yatôv di kituc

vihati la dô kidu tived, di kipyax i la vac lôva madia tiyi xocbê tang ge nêb he ob kê ya vixa. Kiyang tige nêl lec xêyaa myavinê wê Anutu vông ge. ²⁰ Mêdêc he kê wain nôn vac lôva madia wê le vô vigwe levac tige ninya. Om hi pup lec lôva madia tige di vuac mi lam tyip lec xôhô mya di butac mi la tiyi xocbê 300 kilomita ge.

15

Angela vigê vilu di sec yuu ge hòm susu nipaên vigê vilu di sec yuu vac he vigê

¹ Nang dêc a xê do levac ti gê kisii ganê di a xo kiyang tibeac lec. A xê do tiga bêga nêbê angela vigê vilu di sec yuu, lêc he hòm susu nipaên vigê vilu di sec yuu wê ob vông xomxo vô nipaên ge vac vigê. Buc wê susu nipaên tigeê obêc pyap ge od xomxo obêc tulec nipaên ti tii vac lêm, ên xêyaa myavinê wê Anutu vông ge ob tîyôô vac vô buc tige.

² Mêd a xê susu ti tîyi xocbê gwec levac ge. Gwec tige tîyi xocbê glas wê he pilepac hixôn ngwax ge. Di a xê xomxo tibeac. İlage he vông vevac vô bwoc vîmen hixôn i kinu yuu naba wê lê yêp lec ge di nginoo i vêl. He le vô gwec wê xocbê glas ge nînya, di hòm gita wê Anutu vông vô he ge vac vigê. ³ Di he vông lîlo ti wê Anutu nu yuac Moses vông ilage, di bwoc Sipsip Nu tige vông hixôn. Lîlo bêga bê,

“O Apumtau Anutu, xêkizêc kehe ông, yuac vîhati wê ông vông ge xêkizêc, di xe xê di xovô ên xe nêbê ông yuac nivîha. Ông tu xomxo vîhati nên king, di môp wê ông vông ge bôbac di vîxôhilôg nôn. ⁴ O Apumtau, ôcông va tibed wê ông ngîbua ge. Xomxo vîhati obêc xona ên ông di pîmil ông di lam yev vîxa kitu vô ông. Ên môp bôbac wê ông vông ge vîhati lam le seac mî yêp pyap.”

⁵ He vông lîlo tyo pyap, nang dêc a xê mag la, lêc xê Anutu xumac ngîbua sel le taxên gê

lag puunê. Xumac ngibua tige kehe bêga nêbê kiyang wê Anutu vông ge vô nôn lec. ⁶ Mêdêc angela vigê vilu di sec yuu wê hôm susu nipaên vigê vilu di sec yuu vac vigê ge, he lop vac Anutu xumac ngibua tige. He vinyum ngakwi kwem wê paha ge, di vêx let gol lec yagtôv xôn. ⁷ Mêdêc lilii maviha yuudiyuu gee, ti vông pile gol titi vô angela vigê vilu di sec yuu gee, di Anutu wê ob dô maviha luta lêc luta ge, xêyaa myavinê wê i vông ge pup lec pile gol vigê vilu di sec yuu gee mya. ⁸ Mêdêc ngwaxlu lam vac xêseac yuu xêkizêc wê Anutu vông ge di lam pup vac xumac ngibua nilô, om xomxo ti o tiyi wê ob la vac xumac ngibua nilô ge lêm. Lêc angela vigê vilu di sec yuu gee ob vông yuac lec susu nipaên vigê vilu di sec yuu ge pyap lê, lêc xomxo ob la vac xumac ngibua nilô tige timuên.

16

Pile vigê vilu di sec yuu wê Anutu xêyaa myavinê pup lec vac ge

¹ Nang dêc a ngô vya levac ti lam vac Anutu xumac ngibua tige, di vya tyo nêl vô angela vigê vilu di sec yuu gee ên nêbê, “Xêyaa myavinê wê Anutu vông wê pup lec xam pile vigê vilu di sec yuu gee, xam loc kipyax vihati i loc kibun.”

² Mêgem angela taxlee tyo la kipyax susu nipaên wê pup lec i pile ge la kibun. Mêdêc kityax nipaên wê myavinê levac ge ya xomxo vihati wê bwoc vîmen mak yêp lec he di he yev vixa kitu vô bwoc vîmen kinu ge. Kityax ya xomxo tige vihati ma vêl.

³ Nang dêc angela ngwe wê vông yuu ge la kipyax susu nipaên wê pup lec i pile ge la vac gwec. Mêdêc gwec tu hi tiyi xocbê xomxo yibên hi ge, om susu vihati wê dô maviha vac gwec gee yib mima vêl.

⁴ Nang dêc angela ti wê vông yon ge la kipyax susu nipaên wê pup lec i pile ge la vac mia levac di mia wê yêp vac lôva ge hixôn, di mia tu hi xocbê xomxo hi ge. ⁵ A ngô angela wê mi viac mia ge vya wê nêl ên nêbê,

“O Anutu ngibua, ông dô mugên ilage di dô gwêbaga hixôn. Gwêbaga ông yaxên xomxo nipaên nêl kiyang di vông myaviwen vac vô he. Om môp wê ông vông myaviwen vô xomxo ge môp nivîha, ⁶ ên he mi hi plopete hixôn xomxo vông vinên yib di kipyax he hi sea. Mêgem gwêbaga ông vông hi vô xomxo nipaên tigeê ên ông nêb he i num. Om he kô myaviwen nipaên tiyi môp wê he vông ge.”

⁷ Nang dêc a ngô vya ti lam vac alta di tyuc vya levac ên nêbê,

“Vixôhilôg nôl, Apumtau Anutu xêkizêc kehe ông, ông yaxên xomxo nêl kiyang di vông myaviwen vô he i tiyi môp wê he vông ge. Môp wê ông yaxên xomxo nêl kiyang ge nivîha vixôhilôg.”

⁸ Nang dêc angela ti wê vông yuudiyuu ge kipyax susu nipaên wê pup lec i pile ge la vô hiyôv, di Anutu nêbê hiyôv i linac mabu mi ya xomxo xocbê ngwax ge. ⁹ Mêgem hiyôv myavinê nux he xocbê ngwax nux ge. Mêdêc he nêl

kíyang vaxvax lec Anutu wê lee yuu di vông myavinê levac tige vô he. Lêc he o pilepac he di pimil Anutu lêm.

¹⁰ Nang dêc angela ti wê vông vigê vilu ge kipyax susu nipaên wê pup lec i pile ge la vô sia king wê bwoc vimen vông ge. Mêd vigwe vô mapitoc ta di hivun xomxo wê dô vac bwoc vimen kwa ngibi ge vihati xôn, om he yaxên myavinê mabu di he dô nipaên, ¹¹ di he nêl kíyang nipaên lec Anutu wê dô kisii ganê ge ên wê vông myavinê hixôn kityax tulec he ge. Lêc he o pilepac he ên môp nipaên wê he vông ge lêm.

¹² Nang dêc angela ti wê vông vigê vilu di sec ti ge kipyax susu nipaên wê pup lec i pile ge la vac mia levac lê nêbê Yupletis. Mêdêc mia tuac mima vêl, om vông môp vô king he nue wê lam vac vigwe viwen wê hiyôv tyip lam ge. ¹³ Pyap dêc a xê vimwo nipaên yon tîyi xochê vidubac yon ge. Ti lam vac myel levac tige mya, di ti lam vac bwoc vimen mya di ti lam vac plopete kityoên tyo mya. ¹⁴ Vimwo nipaên yon ge, Seten nue yuac yon, om yon vông do tibeac di la vô king wê dô kibun ge vihati ên nêb ob kituc he i lam ên he i vông vevac vô Anutu wê xêkizêc kehe ge, om ob vông vevac vô Anutu lec buc levac wê Anutu vông ge.

¹⁵ Yesu nêl ên nêbê, “Wê lê. A obêc val tîyi xochê tibii yôdac ge, om xam obêc xovô buc wê a obêc val lec ge lêm. Mêgem xomxo ti obêc bin a di yêpên obêc ma, di obêc vêx i nivimihi dô pilihî lec i di la vô môp ge od ni obêc yoc ên i

lêm, ên ob la xêtuac mi xomxo yê lêm. Xomxo tige i dô hixôn xêyaa nivîha.” Yesu nêl bêge.

¹⁶ Vimwo nipaên yon ge kituc king vîhati la dô vac vîgwe ti wê Hiblu vya nêl ên nêbê Amagedon.

¹⁷ Nang dêc angela ti wê vông vîgê vilu di sec yuu ge kîpyax susu nipaên wê pup lec i pile ge la vac lea. Mêdêc vac xumac ngîbua vya ti lam vac sia king wê Anutu vông ge di lam vîxun di tyuc xêkizêc ên nêbê, “Gwêbaga yuac vîhati wê a vông ge pyap vac.” ¹⁸ Mêdêc deac hixelac di vîgwe vô nidîdun di deac tug di ngîyêg mabu ti yoc. Vô buc ilage di i val tyîp gwêbaga hixôn, xomxo o yaxên ngîyêg levac wê yoc tîyi xocbê ngîyêg levac tige lêm. ¹⁹ Om vîgwe levac Babilon hibû la yon, di vîgwe nipwopwo vîhati ge kîpê sea di vô nipaên. Om Anutu xo he Babilon tii vac ên nêbê he i num wain wê i vông ge. Wain tige xêyaa myavînê wê Anutu vông ge. ²⁰ Mêdêc kitôn wê le vac gwec mahigun ge vîhati la mîma vêl di kitôn wê le kehe ge vîhati xôa ma hixôn. ²¹ Mêd lun hikwelac lam gê lag puunê di lam tô lec xomxo. Lun hikwelactige vîyin mabu xocbê pîdi yul ti. Mêdêc xomxo nêl kîyang nipaên lec Anutu ên wê vông vîyin mabu tige tîyi xocbê lun hikwelac ge lam hi he vô nipaên.

17

Vêx yôdac tige kô myavîwen nipaên

¹ Nang dêc angela vîgê vilu di sec yuu wê hòm pile vîgê vilu di sec yuu gee, he ti lam nêl vô a ên nêbê, “Lam, ên vêx yôdac wê dô vô mia levac nînya ge obêc kô myavîwen lec nipaên wê

mi vông ge. Om a obêc hilung vêx tyo vô ông. Vêx tige tixuu lec vigwe levac Babilon wê yêp vô mia ninya ge. ² King wê dô kibun ge vihati vông yôdac vô vêx tige,* di xomxo kibun vihati mi hôm môp yôdac wê vêx tyo vông ge xôn pilihi, om tiyi xocbê he num mi vô mavmav ge.”

³ Angela nêl bêge, mêdêc Myakilôhông Ngibua lam hivun a xôn di kô a mi la vac vigwe myadongên wê xomxo dô vacên ma ge. Lêc a xê vêx ti dô lec bwoc vîmen wê ninivi hi ge ti. Bwoc vîmen tige, lê tibeac hiwocên yêp lec ninivi. Lê tigeê kehe bêga nêbê nêl kiyang nipaên lec Anutu. Bwoc vîmen tige bazub vigê vilu di sec yuu di levac vigê yuu le lec bazub. ⁴ Vêx tige vinyum ngakwi hi tiyi xocbê manôn yuu ge, di vunac vô ya susu gol toto hixôn komkom di ngidax nivihaviha wê mone levac ge. Di hôm kap gol ti vac vigê, di môp nipaên toto tiyi xocbê susu byepacên ge hixôn ningeac toto wê vêx yôdac vông ge pup lec kap tige. ⁵ Di lê ti yêp lec vêx tyo manôn, lêc lê tige tiyi xocbê kiyang pilepacên ti wê kehe nêl bêga ên nêbê, “Vigwe levac Babilon wê tu vêx yôdac hixôn môp nipaên kibun ga vihati kehe.” ⁶ Vêx tige hi Anutu nue hixôn he wê vông i vin Yesu Kîlisi di nêl i kiyang ge yib. Om tiyi xocbê vêx tige num he hi mi vô mavmav ge. A xê vêx tige di a yetac mabu.

⁷ Lêc angela tige nêl vô a ên nêbê, “Bêna lêc

* **17:2:** Kiyang pilepacên lec king wê vông yôdac vô vêx tige tixuu lec xomxo wê sea Anutu di la vông i vin anutu bangwe ge. Ge tiyi xocbê he sea Anutu maviha di la vô anutu mayibên, om Anutu yê he tiyi xocbê vux wê sea vinê mi la vông yôdac vô vêx ngwe ge.

ông yetac ên vêx tige? A ob nêl kiyang pilepacên wê nêl lec vêx tige kehe vô ông, di nêl bwoc vimen wê vêx tyo dô lec ge kehe vô ông hixôn. Bwoc vimen tige bazub vigê vilu di sec yuu di levac vigê yuu le lec bazub. ⁸ Bwoc vimen tige wê ông wê ge, ge dô ilage, léc gwêbaga o dô lêm. Léc obêc timuên ge od obêc val tyip vac vu madia wê mapitoc ta ge mi lam, di Anutu ob kitya i vêl. Vô buc mugên taxlee ge Anutu kivuu xomxo wê ob dô maviha ge lê vac kipihac. Léc xomxo wê he lê o yêp vac kipihac lêm ge he obêc yê bwoc vimen tige di yetac mabu ên wê i dô ila léc gwêbaga o dô lêm di obêc dô timuên i tii vac nang ge.

⁹ “Om xomxo wê piyôp xovôên ge heche va tiyi wê ob xovô kiyang tiga kehe. Bwoc vimen bazub vigê vilu di sec yuu ge kehe ngwe bêga ên nêbê kitôn vigê vilu di sec yuu wê vêx yôdac la dô lec ge, ¹⁰ di kehe ngwe bêga ên nêbê xomxo vigê vilu di sec yuu wê tu king ge. He vigê vilu tu king ilage, léc he o dô gwêbaga lêm, di ti dô gwêbaga, di ti gên o tu king lêm om obêc tu king timuên léc ob dô buc myabo tya. ¹¹ Léc bwoc vimen wê dô ila léc o dô gwêbaga lêm ge, ilage i ge king vigê vilu di sec yuu ge ti, léc obêc tu king ti wê vông vigê vilu di sec yon ge. Léc Anutu ob kitya i vêl.

¹² “Ông wê levac vigê yuu wê le lec bwoc vimen tige bazub ge pyap. Om levac tige kehe bêga nêbê king vigê yuu léc he gên o tu king lêm. Léc obêc timuên ge od he ob kô xêkizêc hixôn bwoc vimen, di he obêc tu king mi dô buc myabo tya. ¹³ King vigê yuu ge, he nilô hixôn piyôp yêp

tibed, om he ob vông lê levac yuu xêkizêc wê he vông ge vô bwoc vîmen ên i kô. ¹⁴ Mêdêc he ob vông vevac vô bwoc Sipsip Nu. Lêc bwoc Sipsip Nu obêc nginoo he vêl, ên i tu xomxo levac vîhati nêc Apumtau, di tu king vîhati nêc king. Di xomxo wê dô hixôn i di ngô i vya mi timu vô i vixa, di ici va vînoo he, di he vông i vîn xêkizêc ge, xomxo tigeê vông vevac hixôn bwoc Sipsip Nu mi he nginoo vêl.”

¹⁵ Angela nêl bêge, nang dêc nêl kiyang ngwe vô a bêga ên nêbê, “Mia wê vêx yôdac tige dô lec ge, kehe bêga ên nêbê ge xomxo vac vîgwe toto di xomxo kidu toto di ninivi toto di vya toto ge. ¹⁶ Di levac vîgê yuu wê ông wê pyap ge, he gee king vîgê yuu, di he hixôn bwoc vîmen tige he xêyaa ob vô myavinê levac vô vêx yôdac tige. Om he ob vông i vô nipaên di kwax i nêc ngakwi vêl di i obêc dô ninivi pîleva, di he obêc ya vêx tige liyôhô di nêc i la vac ngwax ên nêc ngwax i ya i ma vêl. ¹⁷ Anutu vông pîyôp vô he ên nêc he i vông pîyôp wê i nêc ge i vô nôn lec, om he vông lê levac yuu xêkizêc wê he vông ge vô bwoc vîmen tige di i la tyip vô buc wê Anutu obêc vông kiyang vîhati wê i vông ge vô nôn lec. ¹⁸ Vêx yôdac wê ông wê pyap ge, nêc lec vîgwe levac Babilon wê king vîhati dô vac i kwa ngîbi ge.”

18

Vîgwe Babilon vô nipaên

¹ Pyap dêc a xê angela ti lam gê lag puunê. Angela tige lê levac, di xêseac wê i vông ge linac

lec kibun di i vô xêseac ta, ² di tyuc vya xêkizêc ên nêbê,

“Vigwe levac Babilon vô nipaên. Vô nipaên vêl, om tu vimwo nipaên ben. Om vimwo nipaên di menac nipaên wê il xaên mi ma ge, he dô vac vigwe tige. ³ Vigwe tige vô nipaên, ên tibii Babilon didii xomxo vihati vac môp yôdac, om tiyi xocbê he num mia xêkizêc wê tibii Babilon vông vô he ge di la vac môp nipaên. Di king kibun ga, he la vông môp yôdac hixôn tibii Babilon. Di xomxo kibun ga wê mi vông yuac bisnis ge, he kô mone levac vô tibii Babilon lec môp nipaên wê he vông ge.”

⁴ Angela nêl bêge, pyap dêc a ngô vya levac ti lam gê lag puunê bêga ên nêbê,

“Xam vihati wê xam tu a nuge ge, xam lop mi lam vêl ên vigwe tige gec léc xam dô hixôn he di timu vô môp nipaên wê he vông ge di xam kô myaviwen nipaên wê obêc val vô he ge hixôn. ⁵ Nipaên wê he vông ge tibeac luu vêl mi la vô Anutu, om Anutu yê he nêl nipaên tige di xovô pyap. ⁶ Mêgem xam loc vông myaviwen nipaên vô tibii Babilon i tiyi xocbê nipaên wê he vông ge. Om xam vông myaviwen nipaên i luu vêl i loc vô he. Tibii Babilon vông mia xêkizêc vô xomxo tibeac, om xam vông mia xêkizêc i nginoo vêl vô he ên he i num. ⁷ Tibii Babilon yong he lê lec môp nipaên tibeac wê he mi vông ge. Om xam vông myavinê levac vô he i tiyi nipaên wê he vông ge, di vông he byag mabu, ên he tiyi

xocbê vêx ti wê yong ici va di xo vac nilô ên nêbê, ‘A ga a kwin ti om a dô lec sia king, di a o vêxôv ti lêm, di viyin ti ob val vô a di vông a byag lêm.’ ⁸ Nêl bêge, mêgem viyin toto ob val vô tibii Babilon lec buc tived. Om viyin wê ob val vô he ge bêga nêbê he ob vông yidac, di he lie ob yib di he ob byag, di vip ob den he ma vêl, di ngwax ob ya he ben Babilon ma vêl, ên Apumtau Anutu wê ob yaxên he nêl nipaên di vông myaviwen nipaên vô he ge, i xêkizêc kehe.”

⁹ Angela nêl kiyang tige pyap, di king kibun ga vihati wê mi vông môp yôdac hixôn tibii Babilon di mi vông môp nipaên tibeac hixôn ge, he ob yê ngwaxlu wê tyip vac ngwax tumên di ya vigwe Babilon ma vêl ge, om he xêyaa ob vô viyin di he ob byag levac. ¹⁰ Di he ob xona ên myaviwen nipaên wê val vô vigwe tige, om he ob le teva ên vigwe tige di nêl ên nêbê,

“Ông Babilon, ông Babilon, ông vigwe levac, di ông xêkizêc, lêc myaviwen nipaên val vô ông lutived tiyi hiyôv manôn tived, ên nipaên wê ông vông ge.”

¹¹ Mêd xomxo kibun ga vihati wê mi vông yuac bisnis ge, he xêyaa viyin di he byag, ên tibii Babilon wê ob kisuu he susu ge ti dôen ma.

¹² Susu wê he vông mi tibii Babilon mi kisuu ge bêga nêbê gol, silva, ngidax nivîha, komkom wê mone levac ge, nivîmihi kwem wê paha nivîha ge, nivîmihi hi toto, nivîmihi xêlehe, xax wê nivivea nivîha toto, susu vihati wê he sev elepan

levac ge, di susu vihati wê he sev xax tiyi wê mone levac ge, di susu wê he vông ya kapa di ain di ngidax nidodo ge, ¹³ di xax ninivi yuu lehac wê tibii mi ya ge, di viwev wê ngwaxlu nivivea niviha ge, di susu hizi hizi wê nivivea niviha ge, di sanda nivivea niviha, di mia wain, di wel, di plaua, di pidi, di bwoc levac hixôn bwoc sipsip, di xôhông hixôn pêt wê xôhông mi didii ge, di xomxo wê vông yuac pileva ge, ge he mavîha. Xomxo wê ob kisuu susu tige ge ti o dô lêm. ¹⁴ Mêgem xomxo wê mi vông yuac bisnis ge ob yê vîgwe Babilon di nêl ên nêbê,

“Susu nivîha wê xam Babilon nêb xam obêc kô ge vihati sea ông di la xôa ma, di susu yaên nivîha wê mone levac ge hixôn susu vunacên nivîha ge vihati la xôpac ên xam. Om xam ob wêvô he i tii vac nang lêm!”

¹⁵ He wê vông yuac bisnis lec susu tibêgee di kô mone levac vô tibii Babilon ge, he ob xona ên myavinê levac wê vîgwe Babilon ob tulec ge, om he ob le teva ên vîgwe tige di byag mi dô hixôn xêyaa viyin, di nêl ên nêbê,

¹⁶ “Ông Babilon, ông vîgwe levac, viyin levac tulec ông. Ilage xam tibii Babilon vinyum ngakwi nivîha xocbê ngakwi kwem yuu hi ge, di xam vunac vô ninivi ya gol yuu ngidax nivîha hixôn komkom wê mone levac ge. ¹⁷ Lêc hiyôv manôn tibed tige mone yuu susu nivîha vihati la vêl lutibed.”

Nang dêc xomxo vihati wê mi kô sip ge, di he wê kisuu sip ên nêb ob la vîgwe bangwe ge, di he wê mi vông yuac vac sip ge, hixôn he wê

vông yuac bisnis lec gwec ge, he vîhati le teva ên vigwe Babilon ¹⁸ di yê ngwaxlu wê tyip vac ngwax tumên di ya Babilon ma vêl ge, om he nêl vya levac ên nêbê, “Vigwe levac ngwe yêp gê na wê il ob xê i tiyi xochê vigwe levac Babilon ge?”

¹⁹ Mêdêc he yev viwev lec he sea di byag mi dô hixôn xêyaa viyin, di iac levac ên nêbê,

“Ông Babilon, ông vigwe levac, viyin nipaên tulec ông. Ilage xomxo wê viac sip di kô mi la vac gwec ge, he vîhati kô mone levac vô ông lec yuac tige. Lêc hiyôv manôn tived tige vigwe Babilon yêp pileva.”

²⁰ “Xam lag puunê ge, di xam wê Anutu nue ge, hixôn xam sinale yuu plopete ge, xam xêmyaa i vô nivîha ên wê vigwe tyo vô nipaên ge, ên Anutu yaxên i di vông myaviwen nipaên vô i, ên vigwe tige vông viyin levac vô xam.”

²¹ Kiyang tiga pyap, nang dêc angela xêkizêc ti kô ngidax levac tiyi xochê xomxo mi sax wit nôn ya ge ti di nêx i la vac gwec, di nêl ên nêbê,

“A nêx ngidax tige la vac gwec om xôa ma. Om xomxo obêc kitya xêkizêc wê vigwe levac Babilon vông ge vêl tiyi bêge, om xomxo obêc yê vigwe tige tii vac lêm. ²² Mêgem xomxo wê hi gita di vông lilo, di vê ngivêg, di vê vuac gee, he ob vông bêge vac vigwe Babilon tii vac nang lêm. Di xomxo wê kô xovôên nivîha lec he yuac toto ge, he vîhati xôa ob ma vac vigwe tige. Di he wê mi sax wit ya ngidax ge, he êno xôa ob ma vac vigwe tige. ²³ Di xomxo ob byêx ngwax vac lam vac vigwe tige tii vac lêm. Di vêx yuu

vux obêc iima vac vîgwe tige tii vac lêm. Ilage tibii Babilon mi vông yuac bisnis di tu levac gê kibun ga, di he kityoo xomxo vac vîgwe vihati ge ya môp yevac wê he mi vông ge. ²⁴ Anutu yê vîgwe Babilon nê n soên levac yêp bêga nêbê he hi plopete hixôn Anutu nue yib, di xomxo kibun ga vihati wê xomxo hi he yib ge, soên levac tige kehe yêp gê Babilon tived.”

19

Xomxo vihati xêyaa vô niviha ên wê vîgwe Babilon vô nipaên ge

¹ Pyap dêc a ngô vya levac ti tiyi xocbê xomxo tibeac wê dô lag puunê ge tyuc bêga ên nêbê, “Il obêc pimil il Anutu, ên vô il vêl ên il nêd nipaên. Xêkizêc yuu lê levac yêp vô i, ² di i yaxên xomxo di vông myaviwen vô he tiyi nipaên wê he vông ge, om môp tibêge niviha. Vîgwe levac Babilon vông xomxo vô nipaên ya môp yôdac, di he hi Anutu nue yuac yib om Anutu vông myaviwen nipaên vac vô he.”

³ He nêl bêge di tyuc tii vac nang ên nêbê, “Il ob pimil Anutu. Ngwax ya vîgwe Babilon ma vêl om ngwaxlu tige obêc tyip di le luta léc luta.”

⁴ Pyap dêc gyovixa 24 hixôn lili maviha yuudiyuu gee yev vixa kitu vô Anutu wê dô lec sia king ge di nêl ên nêbê, “Kiyang nô n, om il ob pimil Anutu.” ⁵ Mêdêc vya ti lam vac Anutu sia king di nêl ên nêbê, “Xam wê xam tu Anutu nue

yuac di xam mi xona ên i ge, xam wê lêm nipwo ge hixôn xam wê lêm levac ge, xam vihati pimil il Anutu.”

Kiyang pilepacên lec bwoc Sipsip Nu wê nêb ob kô vêx ti ge

⁶ Nang dêc a ngô vya ti tiyi xocbê xomxo tibeac kitucma mi vô nididun levac ge di tiyi xocbê mia yubac vô didun ge di tiyi xocbê deac tug nididun levac ge, di vya tige nêl ên nêbê,

“Il ob pimil il Anutu. Il Apumtau Anutu ge xêkizêc kehe i di i tu king wê il vihati vông ge. ⁷ Om il ob dô hixôn xêdyaa nivîha di hi vixad i pec ên i di pimil i lê, ên gwêbaga buc wê bwoc Sipsip Nu obêc ii vêx ti, om vêx tyo viac i pyap mi dô.* ⁸ Om Anutu vông nivîmihi kwem paha nivîha ge vô vêx tige ên nêb i vinyum.”

Nivîmihi kwem kehe bêga nêbê môm nivîha vihati wê xomxo vông vinên mi vông ge.

⁹ Mêdêc angela ti nêl vô a ên nêbê, “Ông kivuu kiyang bêga bê xomxo wê Anutu ob nêl vô he ên nêbê he i lam ya vizid lec buc wê bwoc Sipsip Nu ob kô vêx ge, he xêyaa i vô nivîha.” Angela nêl bêge, nang dêc nêl vô a tii vac nang ên nêbê, “Kiyang tiga Anutu kiyang nôn.”

¹⁰ Mêdêc a yev vixag kitu vô angela tige ên a nêb a ob kitaa vô i, lêc angela nêl vô a ên nêbê, “Le i lêc yev vixa kitu vô a lêm, ên a ga Anutu

* **19:7:** Vêx tige kehe bêga nêbê xomxo wê vông i vin Kilisi ge, om kiyang wê nêl ên nêbê Kilisi ob ii vêx tige ge nêl lec wê Yesu ob kô xomxo vông vinên mi he la dô hixôn i vac i ben ge.

nu yuac ti xocbê ông hixôn lime vông vinên wê nêl Yesu lê kitong ge. Om ông yev vixam kitu vô Anutu tived. Ên xomxo wê nêl Yesu kiyang kitong ge, Myakilôhô Ngibua ngidu he xôn tiyi xocbê Anutu ngidu plopete xôn ilage mi he nêl i xolac yêp seac vô xomxo ge.”

Xomxo ti dô lec xôhê kwem ti

¹¹ Nang dêc a xê vuayen tax gê lag puunê, lêc a xê xôhê kwem ti, di xomxo ti dô lec xôhê tige, di i lê ngwe nêl bêga ên nêbê, “Xomxo wê viac i yuac nivaha” di lê ngwe nêl bêga ên nêbê, “Xomxo wê nêl kiyang nô.” Xomxo tyo obêc yaxên xomxo nêl kiyang di obêc vông vevac vô he ge od obêc vông tiyi xovôên nivaha wê yêp vô i ge. ¹² Xomxo tige manôn tiyi xocbê ngwax mahelac di i tung kilung tiyi xocbê kilung wê king mi tung ge tibeac lec bazub, di lê ti yêp lec i, lêc ici va xovô lê tige di xomxo ya o xovô lê tige lêm. ¹³ Di i vinyum ngakwi dia ti wê hi lipac lec ge di xomxo nêl i lê ên nêbê, “Anutu kiyang nô.” ¹⁴ Di tibii vevac lag puunê vinyum ngakwi kwem nivaha wê paha ge, di he toto dô lec xôhê kwem mi la timu vô xomxo tyo vixa. ¹⁵ Yipac dia wê manôn ta ge ti le vac i mya, om ob hi xomxo vac vigwe vhati ya yipac tige mi he yib, di ob hêm xax xocbê ain ge ti di viac he ya, di ob kê xax wain nôl vac lôva madia tiyi xocbê tang ge. Kiyang tige nêl lec xêyaa myavinê wê Anutu xêkizêc kehe vông ge. ¹⁶ Lê ti yêp lec xomxo tyo ngakwi yuu vixa pob bêga ên nêbê, “KING VHHATI NÊN KING, DI XOMXO LEVAC VHHATI NÊN LEVAC.”

¹⁷ Nang dêc a xê angela ti le vac hiyôv manôn, di i tyuc vya levac la vô menac vihati wê bôb mi la kisii ge ên nêbê, “Xam kitucma mi lam wa vizid levac wê Anutu vông vô xam ge. ¹⁸ Xam ob wa king liyôhô, di tibii vevac liyôhô, di xomxo levac liyôhô, di xôhô hixôn xomxo wê dô lec xôhô ge liyôhô, di wa xomxo vihati liyôhô, he wê vông yuac pileva ge hixôn he wê viac nue yuac ge, di he wê lê nipwo hixôn he wê lê levac ge. Xam ob wa he liyôhô i ma vêl.”

¹⁹ Pyap dêc a xê bwoc vîmen tige di king kibun ga vihati, hixôn he nue vevac. He vihati lam kitucma ên nêb he ob vông vevac vô xomxo tige wê dô lec xôhô kwem ge hixôn nue vevac wê i vông ge. ²⁰ Mêdêc xomxo tyo hôm bwoc vîmen hixôn plopete kityooên xôn. Plopete kityooên tige wê mi le vô bwoc vîmen manôn di vông do levac ên nêb ob kityoo xomxo ya do tige. Om kityoo xomxo wê bwoc vîmen mak yêp lec he di he yev vixa kitu vô i kinu ge. Yuu gên dô maviha, di xomxo tige nêx yuu la vac madia wê ngwax yuu ngidax salpa tum vac ge. ²¹ Xomxo ti wê dô lec xôhô kwem ge hi bwoc vîmen nue vevac vihati yib ya yipac wê le vac mya ge. Mêdêc menac vihati lam ya xomxo tige liyôhô di i den he.

20

Seten la dô vac madia tîyi klismas 1000

¹ Nang dêc a xê angela ti lop gê lag puunê di lam, di i hôm ki yuu sen levac vac vigê, lêc ki tige wê ob tax vu madia wê mapitoc ta ge ya. ² Mêdêc

angela tige hòm myel levac tige xôn. Myel tige dô mugên ilage, di lê yuu, ngwe nêbê Devil di ngwe nêbê vimwo nipaên Seten. Om angela tige ku myel tige xôn ya sen ên nêb i dô klismas 1,000. ³ Mêdêc nêx i la vac vu madia wê mapitoc ta ge di tung vuayen lec xôn di yu lok lec xôn pîlihi ên nêb myel tige i o loc kityoo xomxo vac vigwe vihati lêm i tiyi xocbê klismas 1,000. Om obêc dô di klismas 1,000 lam la vêl pyap, lêc angela obêc tax vuayen ên i di i lam lop mi loc vîlee buc myabo yang tya.

⁴ Nang dêc a xê sia king ya wê le ge di xomxo ya dô lec. Mêgem Anutu vông yuac vô he ên nêb he i yaxên xomxo nêb kiyang. Di a xê xomxo tibeac kinu. Ilage xomxo tige vông i vin Yesu di nêl i lê kitong di hòm Anutu kiyang xôn pîlihi, di he o yev vîxa kitu vô bwoc vimen hixôn i kinu lêm, di mak wê bwoc vimen vông ge o yêp lec he manôn me vigê lêm. Om xomxo kiku he kwa vêl di he yib, lêc he kidi lec maviha di tu king hixôn Kîlisi tiyi xocbê klismas 1,000. ⁵ Buc tige tiyi xocbê buc taxlee wê xomxo kidi lec maviha ge. Lêc xomxo yibên ya o kidi lec maviha hixôn he lêm. Nge, he obêc dô di klismas 1,000 lam la vêl lê. ⁶ Om xomxo wê kidi lec maviha taxlee ge, he dô hixôn xêyaa nivihã di tu xomxo ngîbua, di yibên wê vông yuu ge nêb xêkizêc ti o yêp wê ob ngînoo he vêl ge lêm. Nge, he ob tu Anutu hixôn Kîlisi nue yuac wê ob vông daa ge, di ob tu king hixôn Kîlisi mi dô tiyi klismas 1,000.

Anutu ngînoo Seten vêl

7 Klismas 1,000 obêc lam la vêl di he ob tax vuayen vêl ên Seten wê dô vac vu madia mapitoc ge ên nêb i lam lop mi loc vilee. 8 Om ob lop mi la kityoo xomxo vac kibun myahipu yuudiyuu wê nêl he lê nêbê Gok yuu Megok. Mêdêc Seten ob kituc he vîhati ên nêb he ob la vevac. He tibeac hîwocên tiyi xocbê luda wê dô vô gwec ninya ge. 9 Mêdec he kitucma di loc mi la kibun vîhati di mîla le buu vîgwe Jelusalem hixôn xomxo vông vinên wê dô vac vîgwe tige. Lêc Anutu xêyaa vin lec vîgwe tige om ngwax ti tum gê lag puunê di lam tô lec tîbii vevac tige mi ya he yib mîma vêl. 10 Seten mi kityoo xomxo vevac tige, om Anutu nêx i la vac madia wê ngwax yuu ngîdax salpa tum vac ge. Om la dô hixôn bwoc vîmen yuu plopete kityooên wê Anutu nêx yuu la vac ngwax îlage. Mêgem yon ob dô vac ngwax di kô myavinê nîpaên tiyi vîdiiên yuu bucên vîhati luta lêc luta.

Anutu yaxên xomxo nên kiyang

11 Nang dêc a xê sia king levac ti wê kwem ge di xomxo ti dô lec, di kibun yuu xôn lag pec ên xomxo tyo di la xôa ma. 12 Mêdêc a xê xomxo yibên, he wê lê levac ge hixôn he wê lê nipwo ge, he vîhati le vô sia king manôn. Mêdêc xomxo tyo wê dô lec sia king ge tidii kîpihac ya. Nang dêc tidii kîpihac ngwe wê xomxo wê ob dô maviha ge lê yêp vac, di kitong kîpihac wê

nêl mîp wê xomxo yibên vông ge di yaxên he nên kiyang tiyi xocbê he vông ge. 13 Mêdêc gwec vông xomxo wê yib mi yêp vac nîlô ge lax vô Anutu, di vîgwe Yibên hixôn Seten ben wê lê nêbê Hel ge vông xomxo wê yib mi dô vac ge lax

vô Anutu, di Anutu yaxên he toto nêñ kiyang tiyi wê he vông ge. ¹⁴ Pyap dêc nêñ Yibên yuu Hel la vac madia wê ngwax tum vac ge. Madia wê ngwax tum vac ge, ge yibên ngwe wê vông yuu ge. ¹⁵ Anutu kitong kipihac ti wê he wê ob dô maviha ge lê yêp vac. Om xomxo ti va lê obêc ma êñ kipihac tige ge od Anutu obêc nêñ i la vac madia wê ngwax tum vac ge, di i lê obêc yêp vac ge od ob dô maviha luta.

21

Anutu tung lag paha yuu kibun paha

¹ Nang dêc a xê lag paha hixôn kibun paha val yêp, êñ lag tikwê hixôn kibun tikwê xôa ma di gwec yêpên ma. ² Di a xê vigwe ngibua Jerusalem wê paha ge. Vigwe tige dô hixôn Anutu, lêc sea ben lag puunê di lam kibun, di i vunacên nivihã tiyi xocbê vêx wê ob kô vux om vunac lec pyap ge. ³ Di a ngô vya levac ti lam vô sia king di i tyuc bêga êñ nêbê, “Xam ngô lê. Gwêbaga Anutu ben lam dô hixôn xomxo om Anutu ob dô vac he mahigun, di he obêc tu i nue, di ici va obêc dô hixôn he, ⁴ di obêc kitya he maluc vêl êñ he manôn, di he obêc yib i tii vac lêm, di he xêyaa obêc vô viyin i tii vac lêm, di he obêc byag nang lêm, di he obêc kilê myavinê tii vac lêm, êñ môp tigege wê yêp ilage, vihati obêc tip vac di ti ob yêp i tii vac lêm.”

⁵ Di xomxo tige wê dô lec sia king ge nêl êñ nêbê, “Ngô lê. A vông susu vihati vô paha lec. Om ông kivuu kiyang wê a nêl vô ông pyap gwêbaga, êñ kiyang tige nôñ tiyi wê xomxo

vihati ob vông i vin ge. ⁶ Gwêbaga yuac vihati wê a vông ge pyap vac. A ga, aca va xomxo mugên di timuên, di a tu susu vihati yang kehe, di a vông a yuac vihati la tiyi. Xomxo ti obêc nêb num mia ge od a obêc vông mia maviha dôên mi i num. Lêc ob kisuu vô a lêm. Nge, a ob vông pileva mi i num. ⁷ Xomxo ti obêc vông vevac vô nipaên mi nginoo vêl ge od a obêc vông vizid nivihavô i, di a obêc tu Anutu wê i vông ge di i obêc tu a nug. ⁸ Dom xomxo wê xona di o le xêkizêc lêm, di he wê o vông i vin lêm, di he wê vông môp ningeac di he wê hi xomxo yib, di he wê vông môp yôdac vêx yuu vux, di he wê vông yevac, di he wê yev vixa kitu vô anutu kityooên, di he wê nêl kiyang kityooên gee, he vihati ob la dô vac madia wê ngwax yuu ngidax salpa tum vac ge. Ge yibên ngwe wê vông yuu ge.”

Jelusalem paha

⁹ Angela vigê vilu di sec yuu wê hêm pile vigê vilu di sec yuu wê susu nipaên vigê vilu di sec yuu dô vac gee, he ti lam nêl vô a ên nêbê, “Lam ên a obêc hilung vêx ti wê bwoc Sipsip Nu ii ge vô ông.”* ¹⁰ Mêdêc Myakilôhông Ngibua lam hivun a xôn di angela tige kô a mi xii la tyip lec kitôn levac ti kisii, di i hilung vigwe ngibua Jelusalem wê dô hixôn Anutu ge vô a. Di a xê vigwe tige lop gê lag puunê mi lam. ¹¹ Di xêseac wê Anutu vông ge vông vigwe tige xêseac ta tiyi xochê ngidax

* **21:9:** Vêx tige kehe bêga nêbê xomxo wê vông i vin Kilisi ge, om kiyang wê nêl ên nêbê Kilisi ob ii vêx tige ge nêl lec wê Yesu ob kô xomxo vông vinên mi he la dô hixôn i vac i ben ge.

jaspa wê mone levac ge, om xêseac ta xocbê deac ge. ¹² Xenac vixa dia le i buu vigwe tyo, di vuayen vigê yuu di tô mi la yuu (12) le vac xenac tige, di angela vigê yuu di tô mi la yuu ge he toto le vô vuayen titi, di Islel kidu vigê yuu di tô mi la yuu ge, he toto lê yêp lec vuayen titi. ¹³ Vuayen yon le vô byeac vilu, di yon le vô byeac vilu, di yon le vô liyuhu viwen, di yon le vô liyuhu viwen. ¹⁴ Xenac wê buu vigwe levac tige le lec ngidax levac vigê yuu di tô mi la yuu wê ngidu xenac xôn ge, di bwoc Sipsip Nu tige nue ngivihi vigê yuu di tô mi la yuu ge, he toto lê yêp lec ngidax tige.

¹⁵ Angela tige wê nêl kiyang vô a ge hóm xax gol ti vac vigê ên nêb ob kô mak vô vigwe levac hixôn xenac di vuayen vihati ya xax tige. ¹⁶ Vigwe levac tige xêkitu yuudiyuu ge vihati tiyima. Om vigwe dia di myakipwoc levac tiyima tiyi xocbê 2,400 kilomita, di dia lec mi la kisii tiyi xocbê 2,400 kilomita. ¹⁷ Médêc angela tige kô mak vô xenac êno, om xenac tige vixa dia tiyi xocbê 144 mita. Mita tige wê xomxo mi vông mak ya ge, lêc angela vông mak ya tige hixôn.

¹⁸ Anutu vông xenac tige ya ngidax jasper, di lox vigwe Jerusalem ya gol wê xêseac tiyi xocbê deac ge. ¹⁹ Ngidax levac vigê yuu di tô mi la yuu wê xenac le lec ge, Anutu vunac vô ngidax tige ya ngidax wê manôn toto ge.

Om ngidax taxlee ti wê xenac le lec ge lê nêbê jasper,

di ngidax ngwe wê vông yuu ge blu lê nêbê sapaia,

đi ti wê vông yon ge kwem lê nêbê aget,
đi ti wê vông yuudiyuu ge niyuu lê nêbê
emelal,

²⁰đi ti wê vông vigê vilu ge hi yuu kwem lê
nêbê sadonikis,

đi ti wê vông vigê vilu di sec ti ge hi lê nêbê
konilian,

đi ti wê vông vigê vilu di sec yuu ge zang lê
nêbê klisolait,

đi ti wê vông vigê vilu di sec yon ge niyuu lê
nêbê belil,

đi ti wê vông vigê vilu di sec yuudiyuu ge zang
lê nêbê topas,

đi ti wê vông vigê yuu ge niyuu hixôn zang lê
nêbê klisoples,

đi ti wê vông vigê yuu di tô mi la ti ge blu lê
nêbê haiasin,

đi ti wê vông vigê yuu di tô mi la yuu ge hi lê
nêbê ametis.

²¹Vuayen vigê yuu di tô mi la yuu wê le vac
xenac tige, ge komkom kwem vigê yuu di tô mi
la yuu wê mone levac ge. Vuayen titi ge Anutu
vông ya komkom levac ti, di môp vihati wê la
vac vigwe tige, gol pileva, lêc xêseac tiyi xochê
deac ge.

²²A o xê xumac ngibua ti le vac vigwe
Jelusalem lêm, ên Apumtau Anutu wê xêkizêc
kehe ge yuu bwoc Sipsip Nu ge, yuu tu xumac
ngibua mi le vac vigwe tige. ²³Đi hiyôv yuu
dentuc ge, yuu o vông yuac di linac vac vigwe
tige lêm, ên xêseac wê Anutu vông ge vông
vigwe tige vô xêseac, di bwoc Sipsip Nu tige
xochê lam di linac vac vigwe hixôn. ²⁴Xomxo

vihati ge tibeac ob la ya xêseac tige, di king kibun ga vihati ob kô lê levac mi la hixôn vac vigwe tige. ²⁵ Vô vidiiên ge he ob tung vuayen lec xôn lêm, di bucên ge obêc vô mapitoc vac vigwe tige lêm. ²⁶ Di xomxo levac vac vigwe vihati ge obêc kô vunacên nivîha wê he vông ge mi la vac vigwe tige. ²⁷ Lêc susu ningeac di xomxo wê vông môt nipaên gee hixôn xomxo kityooên, he o tiyi wê ob vac la vac vigwe tige hixôn lêm. Bwoc Sipsip Nu tige kivuu xomxo wê obêc dô maviha ge lê vac kipihac maviha. Om he wê he lê yêp vac kipihac ge wê obêc la dô vac vigwe tige nilô.

22

Mia maviha dôên di xax maviha dôên

¹ Nang dêc angela tige hilung mia levac wê maviha dôên ge ti vô a. Mia tige xêseac ta tiyi xocbê deac ge, di lam vac sia king wê Anutu hixôn bwoc Sipsip Nu vông ge di lam la, ² di la vô môt wê la vac vigwe Jerusalem ge mahigun. Di xax wê maviha dôên ge le vô mia ninya vilu vilu. Xax tige vuac nôl lu vigê yuu di tô mi la yuu lec kliskas titi, om mi vuac nôl lec dentuc titi. Xax tige lihi ob vông xomxo vac vigwe vihati vô nivîha lec. ³ Di susu nipaên wê Anutu yê tiyiên ma ge ti ob dô vac vigwe tige lêm.

Anutu yuu bwoc Sipsip Nu wê yuu dô lec sia king ge yuu ob dô vac vigwe tige di nue yuac obêc kitaa vô yuu. ⁴ He obêc yê Anutu manôn, di Anutu obêc kivuu ici va lê lec he manôn. ⁵ Di bucên ob yêp i tii vac lêm, om xomxo ob byêx ngwax vac lam i tii vac lêm, di hiyôv ob linac i

tii vac lêm, ên xêseac wê Apumtau Anutu vông ge obêc linac vô he, di he obêc tu king mi dô luta lêc luta.

Yesu obêc lop mi lam lutibed

⁶ Nang dêc angela tige nêl vô a ên nêbê, “Kiyang tiga, kiyang vixôhîlôg nôn yang tiyi wê xomxo vihati ob vông i vin ge. Apumtau Anutu vông xovôên vô plopete ên nêb he i loc nêl i kiyang kitong, di gwêbaga Anutu vông nu angela ti la vô nue yuac ên nêb i hîlung susu hixôn buc vihati wê obêc val lutibed ge vô he. ⁷ Om ngô lê, Yesu nêl bêga ên nêbê, ‘A obêc vena lutibed.’ Yesu nêl bêge, om xomxo obêc ngô kiyang wê yêp vac kipihac tiga di vông i vin ge od he ob dô hixôn xêyaa nivîha. Kiyang tiga nêl lec buc wê obêc val timuên ge.”

⁸ A, Jon, a ngô kiyang tiga vihati di xê susu tiga vihati pyap, om a yev vixag kitu vô angela tyo wê hîlung susu tigae vô a ge ên a nêb a ob kitaa vô i.

⁹ Lêc angela tige nêl vô a ên nêbê, “Ông o kitaa vô a lêm. A ga, a Anutu nu yuac ti tiyi xocbê ông hixôn lime plopete di he wê vông i vin kiyang wê yêp vac kipihac tiga. Om ông kitaa vô Anutu vaci tibed. ¹⁰ Anutu kiyang wê nêl lec buc wê obêc val timuên ge yêp vac kipihac tiga, om le i lêc vilun xôn ên xomxo di lii i loc yêp lêm, ên buc wê Anutu nêb ob vông kiyang tiga vô nôn lec ge vô kwabo lec. Om ông tidii mi i yêp seac vô he manôn. ¹¹ Mêgem xomxo wê mi vông môm nipaên ge od he i timu vô môm nipaên, di he wê mi vông môm ningeac ge he i vông môm ningeac, di he wê mi vông môm nivîha ge od he i vông

môp nivihã, ði he wê tu ngibua ge od he i dô tiyi xomxo ngibua.”

¹² Angela nêl bêge, pyap dêc Yesu nêl ên nêbê, “Xam ngô lê. A obêc vena lutibed, ði a obêc vông myavîwen nipaên vô he wê nipaên ge, ði vông nivihã vô he wê nivihã ge, om a ob vông vô he toto ge tiyi xocbê môp wê he vông ge. ¹³ A ga a xomxo mugên ði timuên, ði a dô buc mugên taxlee ge, ði a obêc dô luta lêc luta, ði susu vîhati yang ge a tu kehe, ði a ob vông a yuac vîhati loc tiyi myahîpu.

¹⁴ “Xomxo wê mi lipac he nivîmihi ge he xêyaa i vô nivihã, ên he tiyi wê he obêc ya xax maviha dôên nô, ði he tiyi wê ob la vac vuayen Jelusalem ði la dô vac nilô. ¹⁵ Lêc xomxo nipaên, ði xomxo wê he mi vông yevac ge, ði he wê vông yôdac vêx yuu vux ge, ði he wê hi xomxo yib ge, ði he wê kitaa vô anutu kityooên ge, ði he vîhati wê xêyaa vin lec kiyang kityooên ði timu vô ge, xomxo tigege wê he ob dô vîxun ên Anutu ben ði ti tiyiên ma wê ob la vac nilô ge.

¹⁶ “A, Yesu, a vông a angela ti loc vô xam pyap ên a nêb i nêl kiyang tiga kitong vô xomxo vông vinên vac konglegesen vîhati. A kehe yêp vac Devit ði a tiyi xocbê pîtua wê linac vigwe vidiien ge.”

¹⁷ Myakîlôhô Ngibua hîxôn xomxo vông vinên vîhati nêl bêga nêbê, “Yesu, ông lam!” Om xomxo wê ob ngô kiyang tiga ge he i nêl bêga bê, “Yesu, ông lam!” ði xomxo wê xo mia ên nêb ob num ge, he vîhati i lam num mia maviha dôên wê Anutu ob vông pileva vô he ge.

¹⁸ A, Jon, a ob nêl kiyang vô xomxo vihati wê ngô kiyang wê yêp vac kipihac tiga ge. Kiyang tiga nêl lec buc wê obêc val timuên ge, om a ob nêl bêga bê xomxo ti obêc nêl kiyang bangwe yêp hixôn Anutu kiyang vac kipihac tiga ge, od susu nipaên vihati wê Anutu nêl kitong mi i yêp vac kipihac tiga ge, Anutu ob vông susu tige vihati myaviwen vô i. ¹⁹ Di xomxo ti obêc kitya Anutu kiyang wê nêl lec buc timuên wê yêp vac kipihac tiga ge bo ti vêl ge od Anutu obêc vông xomxo tige i ya xax maviha dôên nôn wê i vông ge lêm, di xomxo tige o tiyi wê ob dô vac vigwe ngibua Jerusalem nîlô ge lêm. Kipihac tiga nêl vigwe ngibua hixôn xax maviha dôên kitong.

²⁰ Yesu wê nêl kiyang tiga vihati kitong ge nêl gwêbaga ên nêbê, “Vixôhilôg nôn. A obêc vena lutibed.”

A, Jon, a lee yuu ên a nêbê kiyang nôn. Apumtau Yesu, ông lôm lam.

²¹ Vizid nivîha wê Apumtau Yesu vông ge i loc viac xam vihati. Kiyang nôn.

Yesu Xolac
The New Testament in the Patep Language of Papua
New Guinea
Nupela Testamen long tokples Patep long Niugini
copyright © 1986 Wycliffe Bible Translators, Inc.

Language: Patep

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-14

PDF generated using Haiola and XeLaTeX on 11 Nov 2022 from source files dated 9 Oct 2020

3d2c844d-4bc8-590b-bbf2-3a5fcd1f7ad8